

LESA ALASUNGA

I CEBO CAKWE

 ...inshiku shapita. Kabili Ndetasha kuli uyo uupekanya ukunjimbilako ilyo Naisa, Nkashi Angie na Nkashi Gertie. Shikulu abapale. Lintu Naumfwa ico, cena ciletafye ifyakwibukisha ifyakale ifya munshita iyapitapo. Ilyofye tatulafuma pehema, twalikwete ukupuputulwa ukukalamba, panshita yamupepo, iyakushimikila mwi Buuku ilya Kusokolola kwa kwa Shikulu Yesu. Kabili Ine. . . Mupepi fye na cila nshita ya bushiku pa Mulungu baleimba ulwimbo, *Twalililenipo Ukwikatilila*. Natotela, Nkashi Gertie. Kabili Ndi mucine uwansansa ukutula batwimbilako nakabili munshita yabushiku.

² Nkashi Angie acilatila ackwata ishiwi lyakoma. Ukuba, wiumfwa ukuba weka. Naine ninkoma, naine. Lelo, muno lucelo, panuma yakulenga abantu ukucula ukupita nalimo mumbila ya ma ora yabili na citika. . . Iyo imo pashinono ishaba ngefyo. Eico, Naile panse, ilyo umushili wali naubomba, kabili, nifyo fine, ifyo efyo Ncita.

³ Lelo, Nalitemwafye i Cebo, nokucilapo amapalo ya Mupashi wa Mushilo ne Cebo. Kabili lintu Alepala nokwafwilisha, Tekutifye nsange icifulo apakwiminina, eico mwalishiba ifyo caba. Nomba, nalimo nshalande inshita ntali muno nshita yabushiku, pantu ishiwi nalikomako panono, lelo tuleshintilila pali Lesa pa mapalo yesu kabili nobwafwilisho Bwakwe ubwa kumupashi ubo tukabila nganshi mu mweo wesu.

⁴ Kabili nomba, ngefyo Munyina Neville acibilisha, no butantiko bwakwe, pa butantiko bwakwe, ntile. Kabili Ndekabila ukutula onse kakutika kuti aumfwa kuli ubo ubutantiko. Nomba, tanjeba ukulanda ici. Lelo Nshatala ba uwakukana palwa nganshi pakumfwa ku butantiko, ngefyo Nali ici Cibelushi cafumineko. Nibanga abaumfwile ilye mbila? Ico cali iciputulwa icawamisha. WLRP, naini koloko mpaka naini sate, cila Cibelushi ulucelo, ba Neville nebumba lyabo umo baba batatu.

⁵ Kabili Naleeba munyina uyo waambula, Munyina Leo, uyo uli mumuputule. Kabili ali uwasendwa nganshi nacena, ukutula tacitile. . . Atile, “Ntile, ninani uyu kashimikila?” Aali naasha icilimba. Kabili Munyina Gene, nangu bamo pali bena, batile, “Ni Munyina Neville. Ino ninshita yakwe.” Kabili cena mucine caliweme. Teiyo fye yeka, lelo ni lyonse.

⁶ Ndemweba umulandu Natemenwa ukumfwa Munyina Neville alelanda. Te mulandu wakutila pantu ni kashimikila

umusuma, lelo pantu Nalishiba ukutla ekala ico ashimikilapo. Kabili kuti Natemwa mwanjikilako imbila ukucila ukuishimikila. Ico kuti cakwatako ifyakunonkelamo.

⁷ Kabili nomba Nimbilisha, nacibilisha, ukutla Naciba nokulanda, muno nshita yabushiku, pakashita akanono pali: *Lesa Alasunga i Cebo Cakwe.*

⁸ Kabili muno lucelo Nacilalanda pa: *Ukupashanya Ukwa Bwina Kristu.*

⁹ Kabili, nomba, Shikulu alundeko amapalo Yakwe nomba ilyo tulebelenga i Cebo Cakwe. Kabili Ndefwaya ukubelenga ukufuma muncende ishing i mu Malembo, nalimo shitatu, nangu nalimo ukwambulapo nayambi. Pantu, cena Cebo ico tulelandapo. Mwi Buuku lyakulekelesha ilya mu Baibele, i Buuku lya Kusokolola, panuma ya Baibele yonse ya . . . , yapwile, iyi apa i—imbila ku Chalichi. Pa chapitala ya 22 iya mu Kusokolola, no kutendeka na vesi ya 17.

Kabili u Mupashi na nabwina batila, Isa. Kabili lekeni uyo uuli ne cilaka alande ukutla, Isa! . . . lekeni uyo uumfwa ukulanda, Ese. Kabili lekeni uyo uuli ne cilaka ese. Kabili uyo onse ukafwaya, lekeni asende a menshi ayamweo apafye.

Pantu Ndepela ubunte ku muntu onse uuleumfwe fyabo ifya busesemo ubwa ili buuku, Ngo muntu uuli onse akalundako kuli ifi fintu, Lesa akalundako kuli ena ifinkunka ifyo fyalembwa muli ili buuku:

Kabili ngo muntu uuli onse akafumyako ku fyabo ifya ili buuku ilya ubu busesemo, Lesa akafumyapo iciputulwa cakwe ukufuma mwi buuku lya mweo, nokufumyako mu musumba wa mushilo, nokufumyako ku fintu ifyo fyalembwa mwi buuku.

Uyo uupela ubunte pali ifi fintu atile, Icine cine Ndeisa bwangu. Amen. Ifyo fine, iseni, Shikulu Yesu.

Ukusenamina kwakwa Shikulwifwe Yesu Kristu kube naimwe bonse. Amen.

¹⁰ Kabili nomba mulya muli Yohane Washila, chapitala 12 iyakwa Yohane Washila, no kutendeka na vesi ya 39.

Eico nomba bakene ukucetekela, pantu . . . Esaia atile nakabili,

Alipofwisha amenso yabo, no kukosha imitima yabo; ukutla bengakana ukumona na menso yabo, nokumfwa ne mitima yabo, nokupilibuka, kabili ukutla Ningabondapa.

¹¹ Kabili nomba mu Washila Mateo, chapitala 24, kabili mu vesi 35, Yesu alelanda.

Umuulu ne sonde fikapita, lelo ifyebo fyandi tafya katale pita.

12 Kabili mu Bena Galatiya 1:8.

... nangula ifwe, nangu malaika ukufuma ku muulu, onse uubila kuli imwe imbila nsuma iyapusana neyo mwa pokelela, abe kuli imwe uwatipwa.

13 Nomba natukontamike imitwe yesu pakashita fye akanono, kwishiwi lyepepo.

14 Lesa wesu, twaisa kuli Imwe mwi Shina Iya Mwana Wenu uwatemwikwa, Uyo uwatwita ukwisa, aletila, “Mwipushe Taata icili conse mwi Shina Iyandi, Ndi nokucita ico.” Eico twaisa mwi Shina Iyakwa Yesu, ukubalilapo ukulapila pa membu shesu nefyo twafilwa ukucita. kabili noku Mulomba ukutuwamya ukufuma kumampulu yesu yonse, kabili ukuwamya ukutontonkanya kwesu, ukutula tuli nokutontonkanya pafintu ifyalungama, kabili ifyakukuma ku Bufumu bwakwa Lesa. Kabili lekeni amatontonkanyo yesu yabe, muno bushiku, pacintu cimo icingawamya Ubufumu bwakwa Lesa, kabili kuti cawamishapo abantu abo ababa mu Bufumu. Kabili lekeni imitima yesu ibe iyawamishiwa ukufuma kufintu fyonse ifyabipa. Tulekabila ukwenda abaalungama kucinso Cenu, na maboko ayasanguluka no mutima uwalungama. Kabili, oh, Lesa eka ewingacita ici.

15 Kabili twapepa, mwe Taata, ukuti mwingasamba amaboko yesu nokuwamya imitima yesu. Tusambeni mu menshi aya kupatula, ukufuma ku fintu fye sonde, ku Cebo. Kabili lekeni, ukupitila mu Cebo, Mwatile, “Muli abasanguluka, ukupitila mu Cebo.” Kabili twapepa ukutula i Cebo calabebeta mukushika mumitima yesu yonse muno bushiku. Kabili akatuwamya ukufuma kukukana cetekela konse, ukuti imitima yesu inga cincimushiwa mu Mupashi wa Mushilo. Kabili lekeni Alele kuli ifwe, muno nshita yabushiku, ifyo fintu ifyo ifili nokuba ifyakunonkelamo mu Bufumu bwakwa Lesa. Afweni abo, Shikulu, abo abali—abali abanaka munshila, ukukwata, ukucisanga icakosa ukucetekela i Cebo.

16 Kabili, O mwe Lesa, muli ino nshita iyamfifi kabili iyabucenjeshi iyo tuleikalamo, kabili ilyo tulelolesha kuntanshi ku bwafya bwe sonde, tulemonafye imfifi kuntanshi. Kabili Mwatila, “Lolesheni mu mulu, ilyo ifi fintu fyatendeka ukucitika, ninshi ukulubulwa kwesu nakupalama.” Kabili lekeni tube abakoseleshiwa muno bushiku, kabili na Mupashi wa Mushilo, ukusunga ici mu mutima, ukulolesha mucinso cakwa Lesa waku Muulu, Uyo walaya ukulubulwa kwesu pali ino nshita. Kabili ngefyo Yohane, pa cishi, apepele, “Nangu cibe ifyo, iseni, Shikulu Yesu.”

17 Kabili tulepepa ukutula Mwalapela ifi fintu kuli ifwe, muno bushiku. Kabili undapeni bonse abalwele na balecushiwa. Kabili

talalikeni abashila. Iteni ababembu kukulapila. Nokulenga cipya cipya ifwe bonse, ukuti twingafuma pano, ukwikatana pacakucinga icifuba icapwililika icakwa Lesa, ukuya nge fita ifyaiteyanya ku bulwi ubuli kuntanshi.

¹⁸ Nomba, ngefyo tulongene muno bushiku, cila umo mwipepo, ne mendela pali ifwe, Ulutanda lwa Lucelo luletungulula inshila! Kabili nomulalo wamulwani uli munkambi nao, nomukalamba kabeca nafuma aleyumfwa, aletila, “Ishi nshiku shafisungusho shalipita.” Lelo, O mwe Lesa, twimisheni Davidi, uwabulwi, kabeca. Kabili lekeni ulyo Mupashi wikale mu mutima onse, nganshi. Pantu twalombela ici mwi Shina lyakwa Kristu. Amen.

¹⁹ Ukupalama kuli ili sambililo ilikankala nganshi, kabili talyallosha ku cisumino ica muntu uuli onse, nangu ukufulwisha, nangu ukupumfyanya, nangu ukupanga ubulwani. Cena cabelako ukukumana nokwampama kwabantu bakwa Lesa. Kabili umulandu uo Nsalile ukulandapo kwi hema muno nshita yabushiku, nipa mulandu wa mibele ya nshita iyo tuleikalamo. Na—Nalicetekela ukutula tuli pa—pa kutendeka kwa cintu cimo ico isonde lyonse lyaishiba ukutula cili mupepi nokucitika. Takuli nangu umo ulemoneka kwati kuti asontapo, lelo nomba twalishiba ukutula icintu cimo cili mupepi nokucitika. Tepano fye peka. Ni konse konse.

²⁰ Kabili Ndetontonkanya ukutula kuti caba icalinga nganshi, muno bushiku, nga kuti twasenda iyi nshita, ilyo abantu balongene capamo, ukulanda pacintu cimo icingaba icikankala nganshi, icakuwamya, ukutulenga ukwiluka, nokutupela ifisolobesho no—nokwiluka ukusuma ukwa kwa Kristu kabili ukwa Mbila nsuma, kabili nenshita iyo tuleikalamo.

²¹ Nomba, mukubalilapo, Ndefwaya ukulanda ici, ukutula, tapapitile inshita iitali Nali mu seminale yaba Lutherani. Kabili ababwananyina baku Lutherani banjebele, panuma banembela kalata, ukususha ukwakosa nganshi, abakalamba bapancende. Kabili balelanda nokunjeba ifintu, ukutula—ukutula Nali “uwamalele,” kabili nefintu ifingi ifyabipa ifyo, icine cine, ifyo bafililwe ukushininkisha. Pantu, Natile, “Ciwa tekuti ondape.”

²² Nomba, nga ciwa kuti aundapa, ena ni kabumba. Kabili, Kabumba, kwaba fye Umo, kabili uyo ni Lesa. Ciwa tekuti abumbe.

²³ Ciwa taba konse konse. Ena kuti aba fye pacifulo cimo panshita imo; ifiwa fyakwe epo fyaba, kuncende conse. Lelo, Lesa aba konse konse. Ciwa kuti aba fye pacifulo cimo.

²⁴ Lesa wa maka yonse. Ciwa alikwata amaka ayabula impela, ico caba, cikulufye ena kuti aposa ubufi bwakwe. Kabili icintu fye ceka icasuminishiwa ico akwata, caba ukumubwessha ku lukungu lwaku mushili. Ico ecintu fye cimo ico ena akwata.

Kabili, icakutila, nangu cibe ifyo, namapalo yakwa Lesa, ubulayo bwakwa Lesa, ubwakubuka.

²⁵ Eico, Lesa e Kabumba fye eka, kabili Lesa e Umo fye Uyo uwingapanga utubulungwa. Utubulungwa utulepangwa, kabili ukubumbwa kwisafye na Lesa. Eico, Lesa e Kondapa eka, kabili takwaba ukundapwa nakumbi kanofye ukundapwa kwa maka yakwa Lesa.

²⁶ Twalikwata ba dokota abaishibikwa abengabika bwino ifupa; lelo Lesa eundapa. Twalikwata ba dokota abengaputula ukufumyako ubula bwakumpela, nangu ukufumya cimumena, ico ecintufye icalungama ukucita. Lelo Ninani ondapa? Lesa eundapa, pantu Ena e Kabumba fye eka.

²⁷ Nomba, kabili atile, “Nga ifwe, ba Lutherani? Bushe muletonkanya ukutula mutumona ukuba abena Kristu?”

²⁸ Natile, “Mucine cine.” Natile, “Ubufumu bwakwa Lesa bwaba ngo muntu uyo wabyele inyanje shakwe mwibala. Kabili ulucelo lumu, aileko nokulolesha, kabili kwali utumabula tubili utwatumbile, mukutampa kwanshita yakupuka kwafimuti. Kabili umulimi atile, ‘Lolesheni pe bala lyandi ilya nyanje!’ Nomba, bushe ena alikwete nyanje? Ulubali lumbi, ena alikwete, lelo te pali ilya ine nshita.”

²⁹ Nomba, cimo cinefye nga Nalimupele i...Mwanombeke icimuti ca mu oloki, kabili Namupele uluseke. Ulubali lumbi, namukwata icimuti ca muoloki, pantu icimuti ca muoliki cili muluseke. Kabili, lyena, muluseke lwa nyanje, namukwata inyanje, lelo nomba cena cili fye ulubali lumbi. Imwe namukwata inyanje. Nomba, umulimi atile, “Lolesheni kwibala lya nyanje lyandi. Bushe lyena telisuma? Inyanje shandi!” Ashitile inyanje, libe cali libula.

³⁰ Mukuya kwanshiku, ulya mupeti walikulile mpaka wafumya imipupunga. Umupupunga eko ubuluba bwisa, nangu ubuluba bupona ukufuma ku mpupunga, ico ecilenga inyanje ukupapa, ukukumana kwa ilume neikota. Nomba, nga cakutila umupupunga kuti walolesha kunuma nokweba i—ibula ukutila, “Nomba, Nshakwatapo icakucita na iwe. Tawaba na mucikope. Ndi cintu icaibela. Ndi mupupunga. Nine fye newaishibikwa. Iwe taukwete nangu cimo icakucita naco?” Lelo, nomba, ukwabula ibula, ubuluba tekuti bubeko, pantu umupupunga uponena mwibula, kabili uko eko inyanje ifuma. Kabili umweo umo wine uuli mwi—mwibula nao uli mumpupunga.

³¹ Mukuya kwanshita, kwaisa inyanje. Kabili inyanje yaisapo, ulubuto. Kabili, elyo, uluseke lwaeba impupunga ukutula, “Nshikwetepo icakucita na iwe. Tawaba na mucikope.” Lelo nga tacali nimpupunga, nga takwali uluseke.

³² Eico icintu nici, nici, akamupeti akanono kali kupuputulwa ukwa ba Lutherani; kabili umupupunga wali ukupuputulwa

kwaba Methodist; kabili inyanje e uku kupuputulwa. Lelo, bonse capamo, u Mupashi umo wine, u Mweo umo wine uwali mumupeti unono uwetaba, mukubalilapo, e Mweo umo wine uuli mu lubuto.

³³ Nomba, icintu fye cimo ico ba pentecosti... Ndepilibula ba pentecosti abene bene, te betwa fye ifyo. Lelo, i Mbila iyacine iya pentecosti tayaba nangu cimo lelo ukubwekeshapo ukwa Cintu cimo cine icaile mumushili, ifyabikilwe ukupita muli ba Lutherani, ba Methodist, ba Baptisti, ba Presbyteriani. Mwamona? Nomba cena caisafye mwitaba. Kabili nomba Ine...

³⁴ Nga fintu Nshingafwaya ukulanda aya mashiwi, kwaliba ba limbwe limbwe abalemena pali cena. Kabili imwe mwe balimi mwalishiba ifyo ico caba. Cena cintu cimo icipashanya inyanje. Nomba, ico eco tulefwaya ukulandapo, muno nshita yabushiku. Pantu, pantu nga tamuifumishepo pa nyanje shobe, ikalenga iciputulwa conse ukonaika.

³⁵ Eico, ico e cintu cimo ico Ndefwaya ukulenga caumfwika bwino, ukutila, abantu aba muma chalichi yonse ayafilonganano, ilyo fyaisa pita munshita ishikalamba, caba kukula. Kabili nomba ichalichi cili mu lubuto, kabili lulingile ukuleta icintu cimo cine ico caile mu mushili. Eico, cena Chalichi icakula ukufikapo ico tuleikalamo. Kabili iciputulwa cimo tekuti cilande ico ku lubali lumbi, pantu baleikala bwino mu bushiku bwabo. Kabili bali ibala lya nyanje mucinso cakwa Lesa, eico tatufwaya ukucefyu uuli onse.

³⁶ Lelo kwaliba ukusambilisha kumo ileelo, ukucilapo pa milabasa ye sonde lyonse, iyo icefyu i Cebo cakwa Lesa, nokutila, ukuti, "Lesu ekala mu chalichi, kabili temu Cebo."

³⁷ Naumfwile umo pali bakasambilisha abaishibikwa, inshita shabushiku ishapitapo shinono, atile, "Nikwisa wafumishe Baibele yobe? Ndemona ukutila cali ni Lesa ukusenda itontonkanyo iyakumulembela Baibele mu Muulu, nokuipela kuli ba Malaika abanono, kabili baishile ukupita munshila shaku Muulu nokucipela kuli imwe mwebantu." Kabili atile, ukuti, "Takuli nangu umo uwingekala ukusambilisha kwa Baibele. Kabili Yena tayashininkishiwe bwino bwino." Kabili balanda ukutila e Chalichi catampilepo.

³⁸ Nomba, balya bantu, nomba, abo abaya kuli cilya chalichi, abaume na banakashi nga fintu ifwe twaba, kabili balatemwa, nokulya, nokunwa. Kabili bushe kwaliba inshila yonse iyakucilesha? Te lintu Baibele yatila cili nokuba muli iyi nshila; kabili Cena nacilungama.

³⁹ Lelo, kukumukoselesha, Ndefwaya ukuipanga uwakumfwika mukutambalala namukololoka, ukutila Nalicetekela ukutila Ici cintu capwililika icakwa Lesa, icishakoweshiwa, i Cebo icishacinjishiwa, ukutila tapali nangu cimo icingalundwako nangu ukufumyako kuli Cena. Cena

butantiko bwakwa Lesa ubwapwililika ubwa Chalichi Cakwe. “Takuli umufula umbi uwingakula umuntu uuli onse, kanofye uyo uwabikwa kale.” Mulecimona ico? Uyo e mulandu wine Nacetekela mukukana filwa ukwa Cebo cakwa Lesa. Nalandile, kuli umo uwa balya bantu, “Nikwisa uko walandile iyi Baibele yali, ichalichi cobe? Ichalichi cobe ecalembele iyi Baibele?”

“Ee, abashila besu ebalembele Baibele.”

40 Natile, “Nomba mulandu nshi Cenaabela ifyo, ukutula uli uwapusanako nganshi ileelo kuli iyi Baibele?”

41 “Ukuba,” atile, “mwamona, balya bantu baikele munkulo imo, twikala munkulo imbi.”

42 “Lelo,” Natile, “Lesaikele munkulo yonse. Kabili Baibele, nga Yena yaliputwamo, Ni Lesa ubwapwililika Uyo walembele Baibele. Kabili Atile, mu Cebo Cakwe, ukuti, ‘Imyulu ne sonde fikapita, lelo Ifyebo Fyakwe tafyakapite.’”

43 Nomba, caliba icakutinya ku muntu uushamwene ifi fintu uko fileisa. Lelo, nga imwe mwalishibe fye, cena caba fye ukufikilisha kwa Malembo. Kabili nga fintu Napata ukulanda ici cintu mu America, nefintu ifisuma nefintu ifyo twakwata mufitwa bukapepa bwalelo, tekubabwesha panshi, abantu bakwa Lesa bekala muli fyena, lelo Ndefwaya ukulanda ici: Ukutula, calisa ku America, uwafumyapo nokutalukako, kuli bonse babili ba Katolika naba Protestanti, ukufuma mukufundisha kwa Cebo, kabili balibula imibombebele. Kabili iyi mibombebele mibombebele yamano ilangisha ifyakucebula mucifulo ca Cebo. Kabili abantu abena America bawila kufayemba. Abantu abena America baisesa pancende iyakupepa tulesa.

44 Nalikwata ukwashika nomucinshi uwacilapo uwa banamayo. Bamayo ni bamo, kabili umukashi wandi, kabili Nalikwata abana banakashi abanono. Kabili umwanakashi uusunga icifulo cakwe, kabili ni namayo, takwaba nangu cimo icawamisha kunse ye pusukilo, kucalo cesu, ukucila umwanakashi umwine mwine.

45 Lelo, ilyo caisa ku cifulo, ukupepa abanakashi, lyena mwafuma mu butantiko bwa Baibele. Tamwaba ubutantiko muli Baibele ubwakuti ifwe utulepepa umwanakashi uuli onse, Maria, nangu Uwashila Cecilia. Tapabapo Ilembo nangu limo pali ico. Kabili, icapusanako, Tayasuminisha ifyo. Nomba mulandu nshi cabela ifyo, nga cakuti ici cali nintendekele, abo benda na Kristu, kabili calembeba no kuputwa... Muletontonkanya kuti naumfwa amashiwi ya muntu umbi pali cena? Iyo, mukwai. Ici Cebo cakwa Lesa ica Muyayaya.

46 Nomba, kapyunga, nangu shimapepo uwalandile kuli ine, atile, “Lesaba mu chalichi Cakwe.”

47 Natile, “Lesaba mu Cebo Cakwe.” Lesaba mu Cebo Cakwe. Baibele itila, “Mukutendeka kwali Cebo, kabili Cebo ali pamo na Lesa, kabili Cebo ali ni Lesa. Kabili i Cebo caishileba umubili nokwikala pakati kesu.” Lesaba mu Cebo Cakwe.

48 Nomba moneni, mu Cipangano ca Kale, balikwete inshila shibili ishakwiluka imbila ukube yalungama. Ukuti lintu kasesema alesesema, nangu kalota alota iciloto, bena balandile ico kuntanshi ya—ya cakucinga icifuba cakwa Aaroni. Icacucinga icifuba cakwa Aaroni calikwete amabwe ya mweshi ifikolwe fyafyalilwemo pali ici icacucinga icifuba. Alicifwele pacifuba cakwe ukulangisha ukutila aali ni shimapepo mukalamba uwa mikowa ikumi limo na ibili iyamu Israele. Kabili ilyo bena balelanda ici cimonwa, nangu ukulondolola ici ciloto; kabili nga Lesa ashininkisha ico, kwaliko u Lubuuto ulwa kupapusha luwaishile pali uyu Urimu na Tumimu, nokushininkisha ukutila ilye mbila yali iya cine. Te mulandu ifyo camoneke icituntulu, te mulandu ifyo camoneke icisuma ku kusuntinkana nenshita; ngo Lubuuto ulwa kupapusha pali Urimu wa Tumimu talubyashishe, yena yalikenwe, pantu Lesa tali muli yena.

49 Kabili Ndelanda ileelo, oh, Ndefwaya mumfwe: Imbila ili yonse, nangu ngafumine kuli shimapepo, ukufuma kuli kashimikila, ukufuma kuli kasesema, ukufuma ku cintu cimbi icashala, umuntu uuli onse; te mulandu ifyo aba uwa bumupashi, ifyo iofeshi lyakwe lyaba, ifyo acita, nga alibusha abafwa, nga alyundapa abalwele; nga ena ni bishopo mukalamba uwa ku Canterbury, nga ena ni papa waku Rome, nga ena e mutwe uwa cilonganino icili conse icikalamba; te mulandu ifyo aba uwa bumupashi, nangula alilandila mundimi, nangula alishanina mu Mupashi, nangula alishimikila i Mbila nsuma; temulandu neco acita, nge mbila yakwe tayafuma muli Baibele, cena cilubo. *Uyu* ni Urimu wa Tumimu wakwa Lesa.

50 Ilyo Baibele yapwile, malaika alikile, alelanda na Yohane. Elyo Yesu alishile, Umwine, atile, “Ine, Yesu, natumine malaika Wandu ukupela ubunte pali ifi fintu. Kabili nomba isala ili Buuku, lelo wi Likakatika. Pantu uyo onse ukafumyako icintu icili conse kuli Cena, nangu ukulundako icintu icili conse kuli Cena. . .” Ico Cebo cakwa Lesa.

51 Paulo, mukubombela pamo no Mupashi, atile, “Nga cakutila Malaika afuma ku Muulu,” te bishopo mukalamba, te papa, te kadino, “lelo nga Malaika ukufuma ku Muulu, aleta imbila imbi ukucila iyi iili pano, lekeni abe kuli imwe uwa kungwa icilai.”

52 Lelo nomba tulepekanya. . . Nga fintu imyaka yapitapo, ku Mupashi wa Mushilo, Ine lyonse Nalimwebapo, kunuma. Ilyo Hitler na Mussolini baimine, Natile, “Cikesa tulama pamo conse. Kommunisinu ikasenda conse icintu, kabili ikafuma kukapinda kakukulyo.”

⁵³ Nomba biken i amenso yenu pali ici, chalichi. Ciwa euleta ifi ifyakulanda ifyakususha, kabili tacili—cena tacili pamo na Malembo. Cakufulunganya amano yabashasambilila, abantu ababula umupashi. Kabili tuleikala mu bushiku ubwa bukata nganshi ubo abantu abali bonse batala ikalamo; kabili cibe mubushiku ubwafitisha, ku bashacetekela, ukuti bena... nenshita iya kufulunganya nganshi, pantu bena, abo abashaishiba. Ici cakupapusha, ngo bushiku ubo tuleikalamo. Kabili wensansa we pakwishiba ukutula inanga yobe ilekata, nomba, ileelo, ukucipalama muli iyi iyafita, iyabipa inshita.

⁵⁴ Nomba, Nshatemwa ukwita abantu, amashina, lelo Nalalumbula ishina Iya muntu umo nomba. Lelo, Ndapepelako uyu mulumendo. Kabili Ndapepa, inshita yonse, ukumupepelako ena. Lelo, ena cibombelo mu maboko yakwa ciwa, kabili uyo ni uyu muntu, Elvis Presley. Abantu baliya baleshana ukushana kwa boogie-woogie, nangu ukushana kwakuya kuntanshi nokubwelela kunuma. Abantu abena America baliya. Kabili bena baleesha, kuli ulya wine umupashi, ukuleta icintu mu chalichi. Nalitemwa inyimbo sha chalichi ukulisha nge nyimbo sha chalichi, kabili te nyimbo shakuya kuntanshi nakunuma mu chalichi. Lelo ilyo bakwata iyi mipashi, kwalibako icintu cimo kunuma ya ici, kabili ciwa alaipangila umwine kabeca.

⁵⁵ Kabili cacitike ukutula uyu umubusu, uwabwelela inuma, umulumendo umwina Pentecosti atile, eflyo asambilile ukuipukunya nokututuma, ena “acikete nokucisambilila mu chalichi.” Nimembala wa First Assemblies of God, ukufuma ku Memphis, ku Tennessee. Kakumba wakwe ni cibusa wandi.

⁵⁶ Kabili ena cibombelo cakwa ciwa, icakubepa nokukowesha amano ya abo abacaice, iyakubatwala mucifulo mpaka... Bena bacafye incende mu Canada, Ndetontonkanya batwele abantu abacaice kucifulo basungilamo amashilu, inshiku shinono panuma afumako. Kabili mucalo conse, lelo abantu nabafulungana, no mwenso.

⁵⁷ Umulandu bena bacitila ico nipamulandu wakutula tabaishibapo icintu nangu cimo icingacila ico. Oh, ifyo Ningakabila ukutula balishibe Shikulu Yesu; ifyo cawamishapo! Nshileebaula; Ndeumfwilako ubulanda abena kufwa. Kabili nomba bushe tekuti cibe icalinga, mu bushiku ubo tuleikalamo, ukutula ilyo ifintu fileya munshila fiblelelemo... .

⁵⁸ Kabili akalubi kamu America mukashana wafyakucebula fyamu Hollywood. Ilyo, eubika apakwendele kuli America yonse. Ilyo, lekeni afume nemifwalile yakwe iyabipa, kabili mucituntulu onse umwanakashi mu America ali nokufwala nga ena.

⁵⁹ Cena cali u—ubukali bwa mutima kuli ine, tapapitile inshita, naiminine mu Rome, ilyo amaepala ye lyashi yapele ilyashi

lya uyu umwanakashi uo bakwete mwipepala ubushiku bumbi, ali nokukwata umwana mu Hollywood, umwina Roma. Kabili batile, mwipepala, amapepala ye lyashi. . . Icaba, cibusa wandi Baron Von Blomberg, kuti alanda indimi cine lubali ishapusana pusana nokubelenga ipepala pa mbilibili. Atile, “Ena limbi kuti aba umulungu uwanakashi uwa mu America, lelo ena ali muno cilende uwa ci Roma.” We musebanya we! Nomba, bena bafwile bakwata ifintu ifyaba ngefyo, ifyo ififwile ukucitika, pakwendela pamo no mupashi wa mubushiku buno.

⁶⁰ Uyo e mulandu wine ici chalichi ileishila nokupepa Maliya, abanakashi bambi, nefintu. Ni ulya wine umupashi, pesamba lya mutwe wa bukapepa. Kabili uyo e mulandu wine balingile ukufumya amano yenu ku Cebo cakwa Lesa icishakoweshiwa, ukuleta bulyo butantiko. Mucine.

⁶¹ Bushe mulemona ukupilibula uko tulimo? Bushe mulemona imisepela ya bena America, imibele iyo ilimo? Abo baume na banakashi ba mailo. E mulandu wine Yesu atile, “Kanofye ishi nshiku shingepifiwa, takuli umuntu uukapusuka.” Eico, Ndeshintilila amatontonkanyo yandi apa, ukutula tuli panshita yakulekelesha. Shikulu Yesu akesa nombamba line.

⁶² Lelo, umupashi uwa buno bushiku, oh, bushe kuti mwamona? Bikenipo ukutontonkanya kwenu. Bushe kuti mwamona icacitike? Libe uku kupuma, ukuleisa, ukwakuleta icilembo ca ciswango, nokufikilisha Amalembo, pakupatikisha abantu, panuma ukwikatilila kwacitwafye ngefyo cabu mufyalo fimbi, ukubapatikisha mufintu ifyo tabasuminamo, icingalenga ukupakaswa nefyakukana sangwako ukwisa. Bushe tamulemona ukutula America yalisendwa nefyakucebula kwa kalesa akanakashi? Kabili uku kulipilwa, ciwa mumibele yamubili, alepanga inshila iyakuti ici ciilangishe icine. Amen. Ndesubila muleiluka ici. Talukeni kuli cena. Nshilesakamana nibanga ba D.D., Ph.D., nangu conse icili kunuma yaciko; cena bufi.

⁶³ “Pantu lekeni icebo ca muntu onse cibe icabufi, ne Candi cibe icacine,” efa sosa Shikulu. “Pantu imyulu ne sonde fikapita, lelo Ifyebo Fyandi tafyakapite.” I Cebo cakwa Lesa ica Muyayaya cikabila abantu ukufyalwa cipya cipya. Icintu icili conse icapelebela pali ico, baliluba u Muyayaya. Temulandu ne chalichi cintu wabako, nangu uko ishina lyaba, nangu ifyo wacita; lyena lyaliluba. I Cebo cakwa Lesa tacakatale acifilwa.

⁶⁴ Nomba, fyafula palwa ifyo. Kabili Ndesubila mulecumfwa mu Mupashi umo capelelwe. Mwebatemwikwa mwebantu ba Katolika, Nshilemucefya. Muli ba cibusa wandi. Kabili nga tamwali, cinshi ningemininapo. . . Nga Naiminine pano, ukulwa naimwe, Ningile ukuya ku cipailo nokulungamika umutima wandi kuli Lesa. Njiminine pano nokukalipwa kwa mutima, pakulanda ico; lelo u Mupashi, ukulingana ne Cebo, eulensunka

ukulanda ico, nokusoka umukuni uo Mupashi wa Mushilo atulenga ukuba bakangalila.

⁶⁵ Nokumona mucalo aya amapologulamu ayakalamba mucalo, iyakupumya Baibele, batile, “Yaba kwati filindi fya matipa ifyo mulepitamo. Takuli nangu umo uwingekalila kuli Yena.” Ico nacilungama, lilya linefye umubili wasakamana.

⁶⁶ Lelo Mupashi wa Mushilo e Umo Uyo uteka nokutungulula umuntu. Leken i Shikulu amuleke ukumona ubwilulo.

⁶⁷ I Cebo cakwa Lesa entendekelo, nempela, no Muyayaya, inshiku pe. Lesa inshita imo nga alanda i Cebo, Cena tekuti cicinje. Lesa, ilyo umufula we sonde taulalengwa, atile, “Mukutendeka mwali Cebo.” Kabili ni cinshi “Cebo”? Litontonkanyo ukulangishiwa. Taata, Lesa, ukumona ubutantiko bwabulubulo, Ena aloleshe pali cena, nokumona ifyo Satana acitile. Kabili Atontonkenye, kabili Amwene ubutantiko fye; cena litontonkanyo nomba. Lelo ilyo Acilangishe, cena caishileba i Cebo. Kabili inshita imo i Cebo, Cena tekuti cifwe; Cena cilingile ukuba ica Muyayaya. Pantu i Cebo Cakwe tekuti cifilwe ukucila pafyo Engafilwa. I Cebo Cakwe tekuti cise nakabili ukwabula umweo ukucila pafyo Engaba uwabula umweo. I Cebo Cakwe! Abantu bakale, ukupita mu nkulo, balibelenga iyi Baibele. Cena caliputamo inkuta ukutula ilyo Cena calembelwe.

⁶⁸ Kuti nakulembela kalata, iwe limbi kuti watotela, nokutula, “Munyina Branham, Ndetotela pa nkalata yobe.” Niwe fye yalungeme yena. Panuma papita inshita, iyo kalata tekuti ikwate incito nangu imo, kanofye nga cakulangisha icandi nangu icakundwisha.

⁶⁹ Lelo Lesa nga alanda umuku umo, cena camutundu wamuntu onse. Kabili Cili fye icipya, muno nshita yabushiku, nga fintu Cali ora Calandilwe. Lesa alandile nokutula, “Kristu ali Mwana wa mpaanga uwaipaiwe ukufuma ilyo umufula wesonde taulabako.” Ilyo Lesa, ukupitila mubutantiko Bwakwe na mano Yakwe, nokucilanda, Kristu alipaiwe palya pene, nangula Ena mucine taipaiwe mpaka pa myaka amakana yane panuma. Kabili Lesa mulya, ukupitila mukwishibila libela, amwene abali nokupusuka nabo abashali nokupusuka. Kabili palya amashina yesu yalembelwe mwi Buuku lya mwana wa Mpaanga ilya Mweo, pamufula wesonde, kabili ukwampana no Mwana wa mpaanga uwaipaiwe.

⁷⁰ Kabili Baibele itila, munshiku shakulekelesha. . . Umfweni! “Kabili mukanyakristu abepele bonse abaikele pe sonde, abo amashina tayalembelwe mwi Buuku lya mwana wa Mpaanga ilya Mweo ukufuma ilyo umufula wesonde taulabako.” Ikaleni ne Cebo!

⁷¹ Nomba, Nalimona, pakati kaba munyinefwe, kabili Ndelanda ici kuli imwe ba Protestanti nomucinshi, tekulupato,

tekuba namapange yabipa, tekukwatafye ifyakulanda. Cena kuti caba icaanguka ukulanda pacintu cimbi. Lelo, ico, Ninjishiba. . .

⁷² Kabili Baibele itila, “Kacefya, bushe ubushiku bwafika pesa?” Kabili nga kacefya amona umulwani aleisa, kabili afilwa ukusoka abantu, Lesa atile Akafwaya umulopa wabo pa kuboko kwakwa kacefya. Lelo nga kacefya abasoka, lyena ulya kacefya muntungwa.

⁷³ Eico, Ningile ukusoka. Kabili pakati kaba munyinefwe ba Protestanti, Nimona, inshita ishing, panuma ya Mbila yandi muno lucelo, pa mupashi upya, kabili nomba u Mupashi wakwa Lesa mu. . . Nibanga abaciba pano muno lucelo? Nacilungama. Mu mupashi upya, no Mupashi wakwa Lesa. Abengi nganshi no mupashi upya, ukwabula u Mupashi wakwa Lesa. Ndefwaya ici ukumfwika.

⁷⁴ Ileelo, tulesanga ukusela ukukalamba ukwacimfulunganya pakati kabantu ba Protestanti. Kabili nga Naya muma chalichi yabo, cilaba icakuleta ubulanda shimo inshita. Kabili nomba napapata eleleni uku kulanda. Lelo, nga fintu Mupashi wa Mushilo. . . Nga fintu, Nalandile ku mukashi wandi umunono kunuma uko, ubushiku bumbi. Ilyo Namwene abafyala bandi nabalala mulya, bonse babili nabaloleshanya, ifinso umo no mubiye, pantu imweo yabo yalisendelwe. Umo no bulungu bwa mapepo mu minwe yakwe, nga Katolika. Kabili umbi, Baptisti, kulubali lumbi. Bonse babili, bafyala bandi. Kabili Naliloleshe pali bena. Natontonkenye ukutula, “O mwe Lesa umukalamba, minshiabela ifi? Bushe Nimfilwa? Bushe kwalibako icintu cimo?”

⁷⁵ Naebele umukashi wandi, Natile, “Kwaliba ifintu ifingi ifyo Nshaishiba, lelo kwaliba ifintu fimo ifyo Naishiba.” Natile, “Ukufuma inshita Nali umulumendo umwaice, nalimona amenshi munshita yamainsa, ukupwa kwalusuba mumwaka, yaselela panshi ukufuma mucimuti, nokuya mumishila, mukuifisa ayene nokukaba munshita yamupepo. Nalicimona mukupapusha, munshita yafintu ukupuka, ukusela ukuya pamulu, ukuleta amabula na cena, ne cisabo. Nalimona iluba, mubusuma bwaliko munshita yalusuba, lyakonteka umutwe waliko munshita yamupepo, kukutalala, nokufwa; nolubuto lwafwa, namenshi yafwa. Kabili nomba Nalimona, munshita yafintu ukupuka, iluba lilabuka nakabili.” Natile, “Nincetekela. Ninjishiba yalacita ico. Ndecetekela ukutula Uyo Uwitwa Yehova Lesa, Nincetekela ukutula ulya Yehova Lesa eucita ico. Eutungulula icifyalilwa. Nali Mumona, ne cimuti ca mupaini, ne cimuti ca mupopo, ne cimuti ca mubeci, ne cimuti ca mapo, naconse icapusana necibiye. Kabili fintu umuntu, uwapangwa munshila imo neibiye, bonse abapangwa na Shikulu wamano yonse, uyo ni Lesa.” Natile, “Nalishiba ico.”

⁷⁶ Nalicetekela ukutla Yesu Mwana wakwa Lesa. Nalicetekela ukutla, mumubili Wakwe, Ena aali Muntu. Afyelwe ku mwanakashi, nga fintu fye Nafyelwe, lelo u Mulopa Wakwe tawali wa mwanakashi; wali wakwa Lesa. Kabili Yehova Lesa, Logosi, Uyo washundile pe sonde, (mu Mbila yandi muno lucelo), nokufumya umuntu uwakubalilapo ukufuma mumushili wapesonde; akupikile Maliya, no kushunda pali ena, ukufikilisha i Cebo Cakwe, nokulenga Akabulungwa ka Mulopa ako akaletele u Mwana wakwa Lesa uwa mweo. Ndecetekela, mu mubili, Ena ali Muntu. Ndecetekela, mu mweo Wakwe, Ena ali ni Lesa. Ena ali ukuilangisha kwa kwa Lesa pano pe sonde. “Lesa ali muli Kristu, ukuwikisha (Ena) isonde ku Mwine.” Ndecetekela ukutla Tali fye umuntu wa fye, kabili Tali fye kasesema. Aali ni Lesa, Emanuele. Ndecetekela, nomutima wandi onse, ukutla ico cishinka. Ine tekuti nshininkishe ico icine, pantu i...nga cakutla kuti Nacita, nomba cena tekuti cibe ica cicetekelo. Lelo Nalishiba ukutla ifimuti filesa nokuya. Nalishiba ukutla amaluba yalesa nokuya. Nalishiba ukutla icifyalilwa conse cilapilibuka. Isonde balilibika munshila lipitamo, ku Maka yapulamo.

⁷⁷ Kabili icintu cimbi ico Naishiba, ukutla, ku kusenamina kwakwa Lesa, kulabako Icintu cimo icisa kuli ine, mu musango wa kwa Malaika, u Lubuuto. Kabili Alanjeba ifintu, ifili nokucitika, kabili Ndafimona. Nalishiba ukutla tacaba ica cifyalilwa. Cilanangisha ifintu, imyaka ileisa, kabili tapaba inshita nangu imo iyo Catala filwapo. Ndecetekela Ni Lesa umo wine uwali na Yosefe, uwali na Daniele, uwali na Eliya. Ndecetekela ukutla ni Mupashi wa Mushilo Umo wine uyo watungulwile abana ba Israele, ku Ntumba ya Mulilo.

⁷⁸ Eico nomba, Ndi uwaikushiwa ukutla kwalibako icintu cimo, ico Baibele yalilungama, pantu icifyalilwa conse, ifintu fyonse ifyo Njita icicetekelo, ifintu fyonse ifyo Ndoleshapo, ifyo Nshishininkisha, ukushininkisha kuli iyi Baibele ukutla Cena cishinka.

⁷⁹ Namona Yesu. Ena taali ico aba Yuda batontonkanya Ena ukuba. Ena—Ena alifikilishe fyonse ifyalekabilwa ifyo Messiya ali nokuba. Ena ali ni Messiya.

⁸⁰ Kabili Ndemona u Mupashi wali pali balya baume kulya, uku Umona ukwisa kuno kwine nokucita icintu cimo cine. Eico nomba, Naba uwacetekela uwa maka mu Cebo cakwa Lesa uwa mweo, te mulandu ico ciisa icawamisha.

⁸¹ Naliya mu ma chalichi. Kabili Ndelanda ici no mucinshi nomba. Ndasanga ukutla, inshita ishingi, mumachalichi, Ndecetekela abantu balapokelela umupashi wa umo nomunankwe, mucifulo ca Mupashi wa Mushilo. Nga mwaya muchalichi nokumona uko kakumba nalimo apukunya umutwe wakwe; ulukuta lonse lukacita ico. Iwe ngawaya mu chalichi

umo kakumba atila nakwata amafuta yalefuma mukuboko kwakwe; icintu cakubalilapo namwishiba, ibumba lyonse lyacetekela ico, kabili bena balikwata ico. Ukuya mu chalichi umo umwaba ukushana ukwingi nokutoloka nokubutuka uku noku. Nshileebaula ifi fintu; Ndelanda fye ukufuma pa—pa fyakumwenako, ukupela i—icikomo kuli imwe. Nga kuti mwakwata kakumba uwaba nefyakumfwa umfwa, ulukuta lonse luli nokukwata ifyakumfwa umfwa. Nga mwakwata kakumba uyo uwaba uwatalama kabili uwauminina, kabili ulukuta lonse lukaba ulwatalalilwa kabili ulwakosa. Ndecetekela mukapokelela umupashi wa umo no mubiye.

⁸² Sendeni umwaume umusuma no mwanakashi umubi, nokubabika capamo, umo akaya ku mubiye. Ena limbi kuti aba umwaume uwabipa, nangu umwanakashi umusuma. Imwe... “Babili tekuti bende capamo kano bena basuminishanya.”

⁸³ Kabili lekeni Nande ici no mucinshi kabili muli Baibele. No mutima wandi onse, Nalyesha na fyonse ifyaba muli ine, ukukana ba uwa kuilishanya. Pantu, icimonwa ulucelo ilyo Nabikile ilibwe lya pa cifutu, atile, “Shimikileni i Cebo. Bomba umulimo wakwa kabila wa mbila nsuma. Shininkisha bukapyunga bobbe. Pantu inshita ikesa ilyo bakakana ukusambilishiwa Isambilisho ilituntulu; lelo bali nokuikolonganikila kubene, pamo, ukukwata bakafundisha abamatwi ayababa, kabili bakapilibuka ukufuma ku Cine, ukuya kumilumbe.”

⁸⁴ Inga Icinshi? “I Cebo Cenu e Cine.” Yohane 17, “Bashisheni, Taata, pa Cine; I Cebo Cenu e Cine.” Nomba...

⁸⁵ Kabili nga Ndi nomulandu, Napepa ukutila Lesa ambelele uluse. Lelo Ndesha no mutima wandi onse ukupela i—i Cebo ku bantu, ukutila u Mupashi uyo uwingakonka, ilyo Nkeminina pa Bupingushi, tekuti cibe umupashi uwabacula bamo ukutolauka ukufuma mu bantu, nangu ifishishi filepupuka, nangu amafuta yalepona ukufuma mumiinwe; lelo kuti caba Mupashi, uyo uuli mu Cebo cakwa Lesa uwamweo uyo walembele muli iyi Baibele, nokwishiba kwa Baibele. Ico eco Naesha apakalamba.

⁸⁶ Nomba, ukubika itontonkanyo lyesu ilinono pamibele yamuli Baibele. Nabulapo imo, muno nshita yabushiku, ukuleta amatontonkanyo pamo, ukuyabika pamo nokuyaleta kuli imwe; lyena citeni na conse ico mulekabila, ico Lesa abika pa mutima wenu.

⁸⁷ Katubwekele mu Shamfumu Wantanshi chapitala 22, kabili tulesanga ukutila, ukutila kwaliko umuntu, imfumu, uweshina lyakwa Ahabu. Kabili ena ali imfumu iyamaka, umuntu wabulwi, kabili umuntu umukalamba; lelo, uwacifulefule, uwacetekela uwapamupaka. Ishina lyakwe lyali ni Ahabu.

⁸⁸ Mukulekelesha, kasesema Eliya, uyo uwashininkishiwe, kasesema, alandile ukonaulwa kwakwa Ahabu. Imyaka

panuma yamfwa yakwa Eliya, kwaliko kasesema uwe shina lyakwa Mikaya. Eico, Yehoshafati, wishi wakwe, aali umuntu umulungami, uyo uwali imfumu yakwa Yuda, aishile mukutandalila Ahabu, imfumu ya Israele.

⁸⁹ Kabili Ahabu alikwete ubufumu ubukalamba, ubwawama. Nomba moneni, ubufumu ubukalamba ubwabengeshima! Pantu akwete umunono, umukashi uwapentwa, uweshina Iya Yesebele, kabili ena aongwelefy icalo conse, ukufumyako fye abasalwa, ku tulubi utwa calo cakwe.

⁹⁰ Bushe imwe, oh, mwe babwananyina, bushe kuti mwamona umupashi uwakwa ulya umowine ciwa uulebomba mu America ileelo, ba Jezebele banono, umupashi wakongola abana baume bakwa Lesa ukufuma kuli Kristu? Ndelanda ico, tekusekesha. Ino tencende yamipulwe. Ici e cintamba. Kuno eko icipuna ca bupingushi icakwa Lesa caba; kabili i Cebo e cikapingula cakwa Lesa. Nangu, Ena ali . . . Cena bupingushi Bwakwe, i Cebo eflyo caba.

⁹¹ Nomba moneni ifyo ukutila uyu mwanakashi umunono, afwile aali umunono umusuma nganshi, lelo alyongwele icalo mukupwilapo.

⁹² Kabili cinshi ico tutantike ileelo? Ibukisheni, Ndesobela ici, ukutila America alitemwa abanakashi. Ena nikapepa wabanakashi. Umupashi mu America, mumupwilapo yakwatwa kubanakashi. Aba abanakashi banono kuti baisa pali Hollywood, bena kuti baenda kunse mu musebo nokutuma abaume abengi ku mbo ukucila ifikulwa fyabwalwa fyonse ifyo mwingalonganika capamo.

⁹³ Kabili, nomba, mu mibele yakwe iyalungama, ena libwe Iyauma umutengo ku mutima wa mwaume, kabili ipalo ku Bufumu bwakwa Lesa. Mwacimona ico?

⁹⁴ Nomba moneni pakashitafye akanono. Kabili, iyo, tekupingwila libela; ikalenifye tondolo nokukutika. Leken i Mupashi wa Mushilo alete ico kuli imwe. Nomba, ileelo, ifwe natukwata muli iyo mibele nga fintu cali munshita yakwa Ahabu. Ukuba, conse ico umwanakashi alandile, ico eco Ahabu acitile. Nomba, nangufye mu chalichi, bena bapepa abanakashi.

⁹⁵ Tapapitile inshita, ukufulwa kwandi ukwabukapepa kwalimine. Mu Mexico, ilyo Namwene umubusu, namayo umunono, nalishibe palwa ena, cibe, aleisa, aleamfula pamabwe ayakaba. Kabili ilyo bawishi baleenda, nakanya mumaboko yabo, babili, kabili umo akonkele nyina. Kabili ena, alelila, nokufumya inkanda ukufuma pamakufi yakwe, nokutinta amaboko yakwe ukupita mufimabwe, nokulila. Kabili umuntu onse alemulolesha. Ena aile kucibumbwa, ica mwanakashi umo uwafwa uyo ufwile ukuba uwashila. Kabili Nshilelanda ici mukususha. Ndelanda ici mu lubuuto Iwa Cebo cakwa Lesa. Cena mucine, icishakoweshiwa, bumupashi.

⁹⁶ Baibele itila, “Takwaba kapapatila, takwaba kapapatila, pakati kakwa Lesa no muntu, kano Umuntu Kristu Yesu.”

⁹⁷ Nga cakutila ichalichi cakubalilapo cali ni Katolika, nomba mulandu nshi bacinjisha; ilyo uwakubalilapo Katolika aebawile ico, kabili uyu Katolika acisuminisha? “Lyena li sonde lya mwanakashi.” Umupashi ne nsoselo, efyo ili ileelo. Kabili ico cishinka. Ico nacilungama nganshi.

⁹⁸ Kabili Ndesobela ukutila umwanakashi akaba umwanakashi umukalamba. Imwe mwebantu abaice pano muno bushiku, ibukisheni ukutila Munyina Branham nalanda ici. Kabili Nalandile ico mu’ 33, lintu Namwene Ukwisa kwakwa Shikulu. Kabili nafintu imyotoka ikaya ileba kwati lini, mpaka mukulekelesha ikesaba mumusango we lini. Nalimo bamo muno mwalishiba ici; calilembwa pamapepala yakale nefintu. Ulucelo ilyo twali kuno kwi tempile ilinono ilyaba Masoni uko twakwatile i...nangu uko basungila abana banshiwa kuno, mu—muwakonkapo, umusebo wakonkapo kulya, umo twalekwatila umusonkanao. Kabili Nalimwene umwanakashi aima, uwakowela nga fintu aali, kabili atekele icalo. Kabili Ndesobela ukutila umwanakashi limbi kuti aba Kateka, nangu ukucita, nangu ukwisa mumaka ayakalamba ayaba ifyo, mu United States, ilyo isonde talilapwa. Biken i ico mumano. Ninanda ico.

⁹⁹ Moneni nomba icacitike. Yesebele, atekele Ahabu. Amusunkile ena konse konse. Cena cali, taata umulanda... Nangu, mayo ikaleni ku ng’anda nabana ilyo umulume cakolwa ali kunse. Ni wishi umubusu nomba ulesunga umwana ilyo umwanakashi cakolwa naya. Nomba ico tecakusekesha. Ico cishinka. Nshilelanda pabantu abalungami. Iyo, mukwai. Ndelangisha fye umupashi uyo uuli mwisonde.

¹⁰⁰ Nomba moneni. Bushe ici tecakucebula nacimbi... Lolesheni panshita shakwa Ahabu, ifyo icalo catungulwike. Oh, owe! Inkulo ya golide iikalamba yali ni lilya. Ifyo Israele abombe pesamba lyakwa Ahabu, ulya myalu myalu, kabili Yesebele ali icine cine kateka kunuma yaico! Kabili ico cili i...Kuli imwe bakasambilila ba Baibele. Ngefyo Ahabu aupile Yesebele nokuleta ukupepa utulubi mu ba Yuda, mu nkulo ya mfifi, efyo na Protestanti aupile bu Katolika, nokubwisha ubusenshi ukubwelela muchalichi ca bwina Kristu.

¹⁰¹ Kabili ileelo, ibukisheni, ichalichi ca Protestanti caleitwa cilende, pantu ena aartilwe cilende, pamo. Muleibukisha eico. Eico, impoto tekuti yebe iketulo ukutila walifita. Iwe tekuti utoloke ukufuma mu mulilo, mumulilo...pani yakusalwilapo, ukuya mumulilo, mukuayafwilisha wemwine.

¹⁰² Lelo, lekeni tumone Iicine. Iicine eco tulefwaya. Tuli bantu abaleyaa mu Muyayaya, kabili tufwile twakumanya Lesa. Kabili natusange Iicine.

103 Nomba Ndefwaya mumone, nga kuti mwacita ico. Kulya kwaishile...Lyonse, Lesa atumine...Nangu, icintu cakubalilapo, Yehoshafati, umuntu umulungami, aishile mukutandalila Ahabu, nomba aishile kwata ubwafya umwine.

104 Imwe tekuti musakanye icalungama ne cilubo capamo, nokufumyamo icintu icili conse muli cena. Imwe tekuti mubike amafuta pamo na menshi; tekuti fisankane. Nangu nimwe, utubungwe twenu no kwampana kwenu, ukuba nefintu fya mwisonde, kabili ukwikala umweo wakucimfya. Baibele itila, “Fumeni pakati kabo, kabili beni abapatuka, eflyo alanda Shikulu.” Nomba, mwamona?

Cinshi...Mwatila, “Ukuba, Munyina Branham, Na—Nalishiba.”

105 Lelo, mulesenda aba mano benu mwebene; cena cintu capusana ne Cebo. Kabili i Cebo e Cine. Ine nacetekela i Cebo.

106 Nomba moneni, Yehoshafati aishile kuli Ahabu, kabili, oh, ena akwete amalila ayakalamba. Icine cine. Kuti twaciita, ileelo, mukulanda kwapa musebo ukutla, “icapokele.” Kabili aatile umuntu onse. Baipye ing’ombe, nefyaba ngeflyo, ne mpaanga. Kabili balikwete amalila ayakalamba pakati kabo.

Kabili ilyo e lintu uwacetekela aba mubwafya.

107 “Oh, Ndemweba, imwe mwaba fye abamano ayacepesha, ilye ncende inono iya bukakunkuluka wa mushilo. Epela fye. Mufwile mwaisa ku chalichi icikalamba. Mufwile mwaisa. Oh, mufwile mwamona! Kakumba wesu alikwata D.D., D.D., Ph.D.” Mwamona, “Uwesu—kacema wesu! Bakemba besu balemba nga ba Malaika.” Ico tacikwetepo icakucita na Cena, nga cena cintu capusana na EFYA SOSA SHIKULU. Nomba, i . . .

108 Kabili ilyo baipye ing’ombe ilume, kabili balikwete amalila ayakalamba, Ahabu alikwete ico alecita cimbi muli ico. Kabili amapange yakwe yali ayalubana. Ena aleesha ukupanga icilangisho icikalamba, kukuteya Yoshofati.

109 Kabili ico e cintu cine cine ciwa aleesha ukucita ileelo. “Ukuba, ifwe tuli bengipo.” Mucine.

110 I Chalichi cakwa Lesa lyonse caba mu banono, mpaka Yesu akese. “Mwitina mwe mukuni unono, cena bufwayo busuma ubwakwa Shinwe ukumupela Ubufumu.” Ico nacilungama. Twaliba abanono, lelo ico cilifye bwino. Icikulu Lesa epo ali, lyena ninshi ni mubwingi, kuli ine; kabili Ninjishiba ukutla eflyo cili, kuli imwe. Pantu, “Nga cakutla Lesa ali pamo naimwe, ninani uwingaba uwakumulwisha?”

111 Nomba, lelo, ena—ena alikwete epo aiminine kunuma yaico. Kabili lintu acitile ico, atile, “Nomba ukutla ifwe bonse tuli pano kabili nokukwata inshita iisuma nganshi! Bushe kuti waya ku Ramoth-Gileadi pamo naine, ku bulwi? Pantu, icine cine, Syria nakwata ico kulya, lelo Ramoth-Gileadi yandi.

Ico nacilungama. Ifwe twalikhwata insambu. Ifwe tuli chalichi cakubalilapo. Ifwe twalikhwata insambu.” Mwacimona ico?

¹¹² Kabili Yehoshafati atile, “Ukuba, nomba, pakuba ukutula ifwe natukwata inshita isuma,” atile, “abaume bandi baba nga baume benu. Mulandu nshi, ifwe bonse tuli abacetekela, nangu cibe ifyo, eico lekenifye twikatane capamo.” Apangile icilubo icikalamba. Alicitile ico. Kabili Yehoshafati, ukuba uwa bumupashi nganshi . . .

¹¹³ Nga fintu Nacetekela, no mutima wandi onse, ukutula cena cali icipasho ca buno bushiku. Mucine, ku cifulo cimo, munshila imo, Lesa ali nokuleta i Mbila ku bacishinka mu mutima. Atile, mukutendeka, Ali nokucita ico, eico Nakwata ubutantiko ubwatantikwe. Leken . . . [Tapali amashiwi pali tepu.] Imininenifye na Cena.

¹¹⁴ Nomba mumoneni ena. Atile, “Icine cine, Nalaya pamo naiwe. Lelo,” atile, “lolelako pakashita akanono. Ndecetekela, ilyo tatulaya, tulingile ukwipusha Shikulu. Bushe tauletonkanya ifyo? Bonse nga tuli bantu bacetekela, ninshi lekeni twipushe Shikulu.”

¹¹⁵ “Ukuba,” Ahabu atile, “icine cine, ico nacilungama. Oh, mulandu nshi Nshatontokanishe pali ico? Mucine. Nga Nalitontokenye palwa ico, ili lyonse.” Atile, “Ninkwata bakasesema imyanda ine abaishibisha muno mucalo. Nalibafwika bwino. Bonse balikhwata ama D.D.D. ama Ph.D., nefintu fyonse. Balikhwata akabungwe akakalamba kuno lubali, bakasesema, eico Nalabaleta fye kabili twalamona ifyo balalanda.”

¹¹⁶ Mwamona, ico tacapokelelwe na Yehoshafati. Ena a . . .

¹¹⁷ Eico balilebasenda, bonse bakasesema imyanda ine, abalishiwa bwino, abafwala bwino. Ahabu alebalisha nefyakulya fyakwe, pantu alebeba ukucita fintu fye abeba.

¹¹⁸ Mwacimona ico. Mwacimona ico. Oh, mucine, “Ifwe twalikhwata amachalichi ayasuma kuno, incende ishikalamba ishikulu.” Lelo, inshita ishingi, nga kashimikila ashimikila ukucila ama miniti amakumi yabili, akabungwe kaba dikoni kuti kamutamfya. Lelo, umutima obe upalwe, umuntu wakwa Lesa tekuti umfwe kuli ifyo ifyabulamo amano. Cisuma. Nga inama ukucilamo pa lubembu, mulandu cinshi, ulukuta lonse kuti lwamutamfya; lelo ico ni pamulandu wakutula ali mucilonganino. Lelo mu Chalichi cakwa Lesa, takuba ukusalwa ukwingila nangu ukusalwa ukufumapo. Ufyalwafye, inshita imo, u Muyayaya, inshiku pe. Lesa Fye eka e winga kufumyapo; kabili Alapile pa Mwine eka, ukutula Takatale cita ico. Amen. Alishiba ifyo mwapangilwako ilyo Talamuletamo. Tabomba incito Yakwe ukwabula ukuposako amano nga fintu utubungwe twesu tucita ukubasenda, amakumi yatatu— inshiku amakumi yatatu, nangu inshiku amakumi pabula,

mukubomba kwakweshiwa. Alishiba ifyo baba ilyo tabalalanda, ilyo tabalaisa mu Chalichi. Alishiba bwino bwino fye ifyo bapangwa. Uyo e mulandu kufwile kwabela ukufyalwa cipya cipya.

¹¹⁹ Nomba, ilyo abaletele bonse kulya, kabili aile pa cipuna cakwe ica bufumu, umbi umo aishile ikala pa cipuna cakwe ica bufumu, kabili balikele kulya. Kabili batile, “Leteni bonse bakashimikila, bakasesema.” Kabili bonse balifumine, nokucita imingalato yabo. Kabili balikwete inshita iisuma, cisuma.

¹²⁰ Atile, “Nomba, bushe tabamoneka bwino? Kutikeni ku lulimi babomfya.” Oh, owe! Ifyo balanda amashiwi ayakalamba, namwishiba! Oh, “Ahhhh-meni,” nayonse iyo mingalato bapitilemo. Kabili balififulungenye uko. Balicikwete conse.

¹²¹ Eico, ilyo, icintu cakubalilapo namwishiba, atile, “Kabiyeni kulya! Shikulu atila, ‘Kabiyeni kulya!’”

¹²² Atile, “Nomba wamona, Yehoshafati? Mwamona, Ninungamika, nangu cibe ifyo.”

¹²³ Mulandu nshi? Bafwile baishiba ifyakulanda. Bafwile baishiba ifyakulanda, nga teifyo kulufya ifipepala fyabo. Oh, ee, mukwai. Umuntu uwamucitungu alishile, na shimapepo wabuteko, kabili, Ndepilibula ukutla, balibafumishe kwisenge, mukwangufyanya, nga tabalandile ifintu ifisuma pa—pakuboko ukwalebalisha. Pantu, ifyo baishibefye fyali fyakulya ifyakumubili, nangu cingaba ifyo.

¹²⁴ Nalitemwa pakutla kwaliba Ukuboko ukwacenenwe, ukulisha i Chalichi cakwa Lesa.

¹²⁵ Moneni. Elyo Nalibamwene bonse balesesema, “Oh, ee, mwe mfumu! EFYO ASOSA SHIKULU, ‘Kabiyeni kulya!’” Kabili nomba, icintu iceni nici, bena mucine cine bali abaputwamo.

¹²⁶ Lelo nomba moneni. Lelo kulyo kuputwamo ukwa musango ngoyo takwamwikete ulya muntu wakwa Lesa, Yehoshafati. Atile, “Lolela pali miniti. Ndecetekela Nimpanga icilubo apa. Kuliko icintu cimo icilubene. Ine nga nshasisakanishiwa muli ici.” Mwamona? Ing’ombe iilume yalishiba icinka lyakwa shikulu waiko. Mwamona? Kulya kuli...Atile, “Uh, uh, njelelako, Mista King Ahabu, lelo, uh, bushe taukweteko umo naumbi, kasesema?”

¹²⁷ Mulandu nshi, Ahabu kuti atila, “Ukuba, imyanda ine, no mutima umo, nabaume abasambilila nganshi abo twakwata, kabili apa bali no mutima umo, batile, ‘Ubu bufwayo bwakwa Lesa! Ubu bufwayo bwakwa Lesa!’”

¹²⁸ Atile, “Cena tacileumfwika icalungama, nangu cingaba ifyo,” mukati ka mutima wakwe. Amen. Oh, bushe muli abaiteyanya? Ici cili apa. Alishibe ukutla ico tacaumfwike nge Cebo cakwa Lesa. Atile, “Bushe takuliko fye naumbi?”

¹²⁹ Nomba umfweni. Ahabu atile, “Ee, twalikhwatako kakunkuluka wa mushilo. Twalikhwata umo uwe shina lyakwa Mikaya. Lelo, Ndekweba, Nalimupata.” Oh, ee! “Twalikhwata umo naumbi, lelo te wamu kabungwe kesu. Bali mutamfishe inshita ya kale sana. Ali kunse kulya pa lupili ku ncende imo. Ishina lyakwe ni Mikaya.”

¹³⁰ Yehoshaphati atile, “Kuti nafwayafye ukumfwa ifyo alelanda.” Ameni. Mwacimona? Icipasho celeelo. “Bushe takuliko fye naumbi?”

¹³¹ Atile, “Ee. Lelo, oh, ena alipena! Ena lyonse alandafye ifintu ifyabipa palwa ine.” Kuti alanda shani icintu cimbi, lintu i Cebo cakwa Lesa calandile ifintu ifyabipa palwa ena! “Mulandu nshi, ena alebaula nakabungwe kesu. Mulandu nshi, ena nikonaula wa machalichi. Ifyo efyo caba fye. Ukuba bakasesema balyeseshe ukumusenda nokumupela digri ya Bachelor, lelo, oh, elikene ukwikala tondolo. Afuminefye mulya. Ena mukote fye uwafulungana.” Mwamona?

¹³² Yehoshafati alikwete u Mupashi wakwa Lesa uwalinga pali ena, ukufuma kuli ba wishi, atile, “Kuti natemwa ukumumfwa. Kabiye uye muleta.”

¹³³ “Ukuba, ukuba Ndekusoka. Ndekusoka. Alafumya ululenda nafyonse ifyashala. Ena takwata umucinshi uo bambi abanankwe bakwata.”

“Ndefwaya ukumumfwa.”

“Impaanga Shandi shalishiba i Shiwi Lyandi. Umweni tekuti shimukonke.”

¹³⁴ Cena cacitike ukutla Yehoshafati aali umo pabana ba mpaanga bakwa Lesa. Atile, “Ico tacumfwike icalungama.” Tacikwete icalungama... Nacikwata icongo ca cisekese, lelo tacikwete icilelilamo. Nge cela camukuba nefyakupampansha; tacumfwike icalungama. “Kwati kwitla intongwe pa mukupo wa ng’ombe uwauma,” nga fintu Roy Davis alelanda. “Cena tacileumfwikafye bwino.”

¹³⁵ Atile, “Lekeni ng’umfwe kuli uyu muntu uyo waba uwafulungana, nga fintu mwita. Uyo uukana ukuilunda kukabungwe kenu, kabili uyo uwakatafye amatontonkanyo yakwe.” Pantu, alishibe ukutla ulya muntu alingile ukukwata icine, pantu alishibe ukutla tacali.

Eico, atile, “Nalamulaisha, bamusende, kanshi.”

¹³⁶ Eico, baile mumpili, nokuya mukashila akanono, uko konse aleshimikila, nangu minshoni iinono. Kabili kwaishile inkombe.

¹³⁷ Kabili ilyo baile, oh, owe, wekufulwa we! Mulandu nshi, nangula umwaume umo, uwe shina lyakwa Sedekiya, aile no kubika amasengo pa mutwe wakwe. Oh, munyina, alikwete ubusokololo ubwalungama fye. Alikwete amafuta paminwe yakwe, nefintu ifyashala fyonse. Alikwete inshita iisuma. Ee,

mukwai. “Oh, EFYA SOSA SHIKULU, ifyo tuli nokusunka Syria ukwingila mucalo cakwe, naya amasengo!” Balikwete inshita iisuma.

Eico, inkombe iyaishile, atile, “Mikaya?”

Atile, “Ee.”

“Bushe niwe we mwana wakwa Imla?”

“Ee, Nine wine.”

“Bushe niwe kasesema, kakunkuluka wa mushilo, uwafulungana?”

“Ukuba, Ndemona nine wine.”

“Ukuba, imfumu ilefwaya ukukumona.”

¹³⁸ “Oh, alemfwaya?” Mikaya alishibe kale ico, ukwabula ukutwishika. Shikulu alimwebele ifyo ukulongana kulya kwabeleleko. Eico, alimine.

¹³⁹ Eico, atile, “Nomba, lolela pali miniti. Ilyo iwe taulatendeka uku kupuputulwa, Ndi nokukweba ifyakushimikilapo. Nomba, bonse bakashimikila abashala tabashimikila palwa ifi fintu. Wilandapo nangu cimo palwa lubilo lwakucinfyanya ulwa bakabalwe, kabili wilandapo nangu cimo palwa *ici*, kabili—kabili, nangu *ici* na *ico*, pantu, mwamona, bakashimikila bambi tabalanda ico.” Atile, “Ulande icintu cimo cine nga fintu bacilanda.” Nomba, ifyo eflyo cingaba ileelo.

¹⁴⁰ Nomba twalalanda ifyo Amalemba yalanda. Atile, “Mikaya, bakasesema bambi nabasesema ifisuma ku mfumu yesu. Kabili nomba, namwishiba, ena muntu uwacindama,” nangu cingaba ifyo. “Nomba imwe mufwile mwalanda icintu cimo cine ena, bena balanda, nokusesema ifisuma.”

¹⁴¹ Atile, “Nga fintu Lesa wandi ali nomweo, Ndi nokulandafye ifyo EFYA SOSA SHIKULU yaba.” Amen. Lesa tupeleni ba Mikaya bamo; ikaleni ne Cebo. Ena limbi nga takwete ifyawamisha fyonse ifyo bambi bakwete. Limbi tekuti akwate ama digri bambi bakwata, ba Ph.D. Limbi tekuti abe necifulo mwibumba lya bantu. Limbi takwata umukalamba D.D., kucinso ca bantu. Lelo alikwete i Cebo. Amen. Oh, ico eco. Alishibe ukutila Lesa ali nokusunga i Cebo Cakwe. Eico atile, “Ico fye Lesa anjeba ukulanda, Ndi nokulanda icintu cimo cine ico Lesa alanda.”

¹⁴² Kabili nga Lesa asobela libela ishi nshiku shileisa, casobela ici cintu icalubana, ukupepa kwa banakashi, nangu ukupapatila kwa bashila, umulalilo waba mushilo; nga Aebaula ubuwelewele bonse, nefe fintu fimbi. Kabili atile, “Nga filya Yane na Yambre bakene Mose, eflyo nabo bakaba munshiku shakulekelesha.” Ndesusha ici icintu, mu Cebo cakwa Lesa, nokutila cena cilubo.

¹⁴³ Ikaleni ne Cebo. Nshilesakamana ifyakumfwa umfwa nifinga ifyo mumfwa, ifyo mwingatoloka nokubilikisha, ifyo

mwinga cita *ici, icibiye*. Nga cakuti u Mupashi wakwa Lesa taulekutungulula kuwasanguluka, uwapwililika umweo kucinso cakwa Lesa, cisuushe ico cintu. Lesa alafwaya imwe ukufumya amafuta, nga Ali mupangile icimuti ca miolife nangu icishima ca mafuta icamu Texas. Lekeneni mwebe icintu cimo, Lesa alikwata amapange pa fintu fyonse. Ikaleni ne Cebo. Ifyo Baibele ilanda, ikaleni na Cena. Cena ni Urimu wa Tumimu wakwa Lesa.

¹⁴⁴ Kabili Mikaya umukalamba, kasesema, aikele pa Cebo cakwa Lesa; aile palya, nokupamafye nge nkalamo. Bulya bushiku Shikulu amupele icimonwa. Ena alishibe apo aiminine. Kabili moneni. Oh, munyina! Bambi balikwete icimonwa, nabo, lelo icimonwa cabo tacaikatene ne Cebo cakwa Lesa. Lelo Mikaya ali pamo ne Cebo cakwa Lesa. Pantu, Eliya, uyo wakwete i Cebo cakwa Lesa, kasesema, kacefya, alilandile kale ico cali nokucitika kuli Ahabu. Eico nomba Mikaya kuti alanda shani ukutula icintu cimo icisuma cali nokucitika, lintu i Cebo cakwa Lesa calandile icabipa ukutula cili nokucitika? Eico, ena aali pamo ne Cebo.

¹⁴⁵ Munyina, te mulandu ifyo akasonshi kalepa shani, nangu ifyo abantu bafwala bwino, amasambililo ayo kakumba akwata, nangu icintu icili conse palwa ici, nangu fintu Bishopo Scheen alanda, nangu umuntu umbi, nga nacipusna ne Cebo, talukako kuli ico. Ikala mu Cebo. Apo epo umubomfi wa cine uwakwa Lesa ekala, apo pene pali ico Cebo. Ico nacilungama.

¹⁴⁶ Mikaya aendele ukuya kulya, kabili amwene icimonwa cakwe. Kabili lintu aseseme, nokumona icimonwa, amwene ico caampama bwino ne Cebo, ukusuntinkana ne Cena. Alishibe ukutula alikwete EFYO ASOSA SHIKULU. Aile kulya.

¹⁴⁷ Kabili atile, “Mikaya, wemwana wakwa Imla, bushe kuti Naya ku Ramoth-gileadi, nangu bushe Njikale niyako?”

Mikaya atile, “Kabiye.”

¹⁴⁸ Atile, “Nomba ico tacileumfwika bwino.” Nangula alishibe bwino, umwine.

¹⁴⁹ Kabili abengi muli balya bantu balailunda kuli filye fintu ifikalamba ifya pamulu, ukuba fye abalumbuka. Balishiba icapusanako. U Mupashi wa Mweo uyo ubomba mwisonde, kuti wabeba icapusanako, nga balikwetekofye akasasatu ka Mweo palwa bena bonse. Bakonka ifi ifyawama, ifyaba cula ukutolauka, nefishishi filepupuka, nokututuma, nokutoloka, nokubutuka, nasyonse ifintu, ilyo balishiba ukutula ico cilapililikana. Lelo bena balaya pamo na cena pa mulandu wafya kumfwa umfwa. Nani usakamana palwa fyakumfwa umfwa?

¹⁵⁰ Ndefwaya EFYA SOSA SHIKULU, ico nacilungama, ifyo i Cebo calanda. Nomba, Nalicetekela muli bukapepa ubwakumfwika pa mutima. Nalicetekela mu nsansa, isho Ningshiba. Nalicetekela mu Maka ya Mupashi wa Mushilo.

Nalicetekela mukundapwa kwa maka yakwa Lesa. Nalicetekela mukusokololwa konse ukwa fyabupe, lelo fyena fifwile fyabikwa mu Mubili nakatina, ukubomba bwino bwino mukumfwana ne Cebo.

¹⁵¹ Ilyo Naya muncende nokutendeka ukushimikila, ukwita abantu ku cipailo, umwanakashi aima nokulandila mundimi. Ukuba, we musebanya we! We—we bulanda we! Ico cilelangisha ukutila kakumba wabo taba pa Cebo cakwa Lesa, nga teifyo kuti alesha ico cintu, nokutila, “Wiesha ukucita ico.” Mwamona? Takuli nangu cimo icakususha icabupe; cena tacibomfiwa bwino. Mwamona?

¹⁵² Kabili nefintu ifingi, kuti Nasenda ama ora palwa cena. Namwishiba ico Ndelandapo. Ico cili, conse pamo, bu Katolika nabu Protestanti. Lelo, ikaleni mu Cebo.

¹⁵³ Moneni, nomba. Kabili ilyo amwene icimonwa, aile nokumweba. Atile, “Kabiye kulya.”

Atile, “Miku inga Nakweba ukunjeba icishinka!”

¹⁵⁴ Atile, “Lelo Nacimona Israele nasalangana, nge mpaanga ishishikwete kacema.”

¹⁵⁵ Kabili atile, “Nacikweba. Nacikweba. Nacishiba ifyo aciba nokulanda, ilyo taulamuleta nakuno.” Ico nacilungama. Tekuti alande icintu cimbi. Alikwete i Cebo cakwa Lesa, Ena tekuti acite cimbi ukucila pakususha cilya cintu.

¹⁵⁶ Kabili Ndetila, muno bushiku, mu lubuuto lwa Baibele, Ndeebaula ubuwelewele, imyumfwile, ukufulungana, nefintu ifitila, “I Cebo cakwa Lesa, takwaba nangu cimo kuli Cena; kabili ichalichi calilungama,” nefintu fyonse ifyashala. Nacisusha ico, mwi Shina lyakwa Yesu Kristu, pa nsambu isha Cebo cakwa Lesa. Leken i myulu ne sonde fipite, lelo i Cebo cakwa Lesa cikale ica Cine inshiku pe. Ico nacilungama.

Nomba, atile, “Kabiye nga ulefwaya ukucita ico.”

¹⁵⁷ Kabili nicinshi cacitike? Ulya umulumendo alikwete fyonse ifikalamba ifyakumfwa umfwa, alikwete inshita iisuma, alileshinguluka, pantu ali i—ali intungulushi ya chalichi. Alishingulwike nokumutoba ulupi petobo, nokuboko kwakwe, alimumine. Oh, Ndemumfwa aletila, “Iwe uli munono, uwabufi, kakunkuluka wa mushilo. Nikwisa uko u Mupashi wakwa Lesa waciya, ukufuma muli ine, ilyo Waciya muli iwe?”

¹⁵⁸ Atile, “Nawishiba ico Namwene?” Atile, “Ilyo imwe bonse mwalekwata inshita yenu iikalamba kuno lubali, kabili namashiwi yenu ayakalamba, nga fintu cali, kuno lubali, kwaliko icintu cimo icalectitika mu Muulu, panshita imo ine.”

¹⁵⁹ Kabili Ndemweba, ilyo abana baume abalubile bali mwicinka lya nkumba, kabili America aleshana pesamba yakulisha kwa boogie-woooogie nokushana kwakuya kuntanshi

nakununa, naba Elvis Presley babo kabili *Abo Abatemwa Susie*, kuliko ukulongana mu Muulu ukulecitika nomba.

¹⁶⁰ Atile, “Les a iswile amawindo nokunsuminisha ukuloleshamo. Ilyo mwakwete inshita yenu iyakushana kwakuya kuntanshi nakunuma, Les a linsuminishe ukulolesha mu Muulu, kabili Mulya Namwene icintu cimo.”

Atile, “Cinshi ico wamwene?”

¹⁶¹ Atile, “Namwene umulalo uukalamba uwakwa Les a, Les a, nawikala kukuboko kwa kukulyo naku kukuso. Kabili kwali ba Malaika ku kuboko kumo kabili ku lubali lumbi.” Kabili atile, “Ilyo Namwene ba Malaika, umo naikala kukuboko kumo kabili naumo kulubali lumbi, umulalo wamu Muulu naukolongana.” Kabili atile, “Les a atile, ‘Nani Nalalenga ukwika?’” Oh, owe! Kutikeni. “Ninani uo Ningatuma kulya, pakutila twingaleta Ahabu kulya ukufikilisha i Cebo Candi, ico calandilwe na kasesema Wandi?”

¹⁶² Ikaleni ne Cebo, munyina, temulandu niyanga amalila yakushana ukuya kuntanshi nakunuma bakwata, kabili nefyo bangala ico mu chalichi, nefyo bacita mu chalichi, ifyo bena bacita *ici*, *ico*, nangu *cilya*. Ikaleni ne Cebo. Ico nacilungama. Les a alasunga i Cebo Cakwe, cila nshita.

¹⁶³ Moneni. “Lelo atile, ‘Nani twingatuma ukuya kulya? Ninani twingatuma ukuya kulya nokuyaleta Ahabu kuno, pantu cena cifwile cafikilishiwa?”

¹⁶⁴ Kabili atile, “Namwene umupashi uwabufi waima. Atile, ‘Lekeni nje. Nalaya kulya nokuya ingila muli cila umo muli bena ba bishopo, nabalya bakasesema, naba shima pepo bamubuteko, nabonse abashala. Kabili Nkabaputamo ukusesema ifyabufi, pakutila Ningabatwala kulya.”

¹⁶⁵ Nomba loleleniko panono. Ikatilileni. Bushe namuipekanya? Ukuputwamo, ukuputwamo ukushibombela pamo na Baibele, kuputwamo ukwalubana.

¹⁶⁶ “Munyina Branham, kuti twashininkisha shani ukutila tuli abalungama? Tulamona *ici* cileisa. Tulamona *ici* cileisa, kabili nafyonse ifi fintu, nefyawamisha.” Ikaleni ne Cebo!

¹⁶⁷ Mucine, bonse babili bali abaputwamo. Uyu apa umunono, aiminine eka. Ena ali uwaputwamo. Pano pali imyanda ine, ba bishopo abasuma, kabili bali abaputwamo. Kabili cila umo aletila, “EFYA SOSA SHIKULU.”

“Lelo musango nshi twishibilamo ico icalungama?” Ikaleni ne Cebo.

¹⁶⁸ Mikaya alikwete i Cebo, kabili alishibe ukutila ububi bwali nokubucita ifyabipa. Alishibe ukutila bumyalu myalu, ukutila bukapapa bwakuipanga ukucetekela, ico cintu icakwete ifyapamulu muli cena, kabili Yesabele uwapentwa, kabili nafyonse ifi fintu fimbi, ali nokubombelwapo kukuboko

kwakwa Lesa uwa mweo. Pantu, kasesema, i Cebo cakwa Lesa efyo calanda.

Mwatila, “Bushe kasesema ali Cebo cakwa Lesa?” Ee, mukwai.

¹⁶⁹ Bena bakeshiba. “Munshita ishakale kabili mufyakaniko ifingi Shikulu alandile kuli bashifwe ukupitila muli bakasesema, muli shino nshiku shakulekelesha alandile ukupitila mu Mwana Wakwe, Kristu Yesu.” Ico nacilungama. Icline cine, cena cali Cebo cakwa Lesa.

¹⁷⁰ Balya bali palya, abaputwamo, batontonkenye ukutula bali abalungama! Nshilestila tabali ababufumacumi. Bena bali ababufumacumi. Bena bali abaume abakalamba. Bena tabali abantu abashasambilila. Bena tabali fye umuntu uwa nshita ya bushiku imo. Bena bali abantu abakalamba, abasambilishiwa mu Cebo, abaubwa. Lelo ukusubwa kwabo takwaendele pamo ne Cebo ca Baibele. Uyo e mulandu wine Mikaya aishibilee ukutula bali mucilubo.

¹⁷¹ Kabili Baibele itila, ukuti, “Mubushiku bwakulekelesha, abantu bakaba abaitemwa abene.”

¹⁷² “Mulandu nshi, ulepilibula ukunjeba, ukutula ulya umunono kuti anjeba? Ine ndi bishopo. Nine umukalamba *wakuti na wakuti*. Nine muntu umukalamba mu chalichi ca Katolika. Nine umukalamba, muli ba Methodist, ba Baptist, nangu fye muli ba Pentecost. Nine shima pepo wamubuteko. Ulepilibula ukunjeba ukutula, walileka uyo muntu. . .” Ico nacilungama. “Bushe ulepilibula ukunjeba *ici, ico?*”

¹⁷³ Baibele itila, “Bakaba abaitemwa abene, abayumfwa, abaitumika, abamiponto, ababula icumfwila, abashitotela, ababula umushilo, ababula ukutemwa kwacifyalilwa, abashingatekwa, abapata aba abacita ifisuma. ukukwata imimonekele ya bukapapa, nga filya fine bacitile, lelo ukukana Amaka yabuko, i Cebo.” Nga tabalandile ukulingana na Ico, takwaba u Mweo kuli bena. Ico nacilungama. “Ukukwata imimonekele ya bukapapa, lelo ukukana Cena; kuba musango ifi talukeniko. Pantu aba musango uyu baya ku ng’anda ne ng’anda, na mabuuku yabo ayanono ne misonkano, kabili nafimbipo, abatungulula abanakashi abapumbu abaisulamo nolubembu, abasendwa nolunkumbwa ulwingi, abasambilila lyonse, nokukana isa ku Cine.”

¹⁷⁴ Bena baba abamusango shani? Yambre na Yanes; bakwata imisango yonse iya fyawamisha nefintu fyonse. “Nga filya Yane na Yambre bakenye Mose, efyo na aba bakana Icline: abantu abalubana amano, palwa Cebo.” Besha ukusenda i Cebo cakwa Lesa noku Cipondamikila mu cintu cimbi, mu cawamisha, atemwa akabungwe ka bukapapa, nangu ukubapangila ishina ilikalamba, nangu ukuipangila abene ishina ilikalamba. “Kuba musango ngoyo talukeniko.” Ikaleni ne Cebo!

¹⁷⁵ Cinshi icacitike? Atile, “Nalimwene uyu mupashi uwabufi watile, ‘Nalaya kulya, ukuya baputamo. Nkabalenga ukusesema ubufi.’” Kabili balya baume, balefwaya ukusekesha icintu bwingi!

¹⁷⁶ O mwe Lesa, twafweni. Baba abaipelesha ukusenda ici, “Ukuba kafundisha wamatwi ayababa, bakapilibulwa ukufuma ku Cine ukuya ku milumbe,” ngefyo Mupashi wa Mushilo asokele nokutweba, munshiku shakulekelesha, ifyo bakaba. Ukuba abaipelesha ukuba abalumbuka, abene beka, ukukwata umulabasa uukalamba, nangu icitunshi tunshi icikalamba, nangu ishina ilikalamba, nangu icikwata icikalamba mu chalichi, nangu icintu icikalamba, nokuimya abene. Eico ukufwaya ukucita ico, mpaka bafilwa ukumona ico mu Cebo.

¹⁷⁷ Lelo, Mikaya alemona i Cebo. Ena alikwete Icine. Alikwete i Cebo. Moneni, nomba, alandile icali nokucitika.

¹⁷⁸ Kabili uyu muntu aendele nokumuma pacinso, atile, “Nikunshila nshi u Mupashi wakwa Lesa waile?”

¹⁷⁹ Atile, “Uli nokucimona ilyo walaikala mucifungo ca mukati, naufisama.”

¹⁸⁰ Kabili Ahabu atile, “Bikeni uyo muntu mucifungo. Mwisale yonse iyi imisonkano, nangu cibe ifyo. Tatulefwaya nakabili ificitwa fya bakakunkuluka wa mushilo muno.” Mwisakamana, cileisa. “Mubikeni mucifungo nokumupela umukate wabulanda namenshi yabulanda. Kabili lintu Nkabwela mu mutende, Nkabombela pali ena,” mu mashiwi yambi, “ukumuputulako umutwe wakwe.”

¹⁸¹ Mikaya umukote, aiminine pa Cebo cakwa Lesa, pakwishiba icimonwa cakwe. O mwe Lesa! Alishibe ukutula icimonwa cakwe cali filya fine ne Cebo cakwa Lesa, cena tekuti cifilwe. Atile, “Nga ukatala bwela, mu mutende, Lesa talandile kuli ine.” Ameni, na ameni!

¹⁸² Oh, mwebantu! Inshita naipwa. Lelo Ndefwaya ukulanda ici kuli iwe, cibusa wandi uwatemwikwa. Wiesha (ukutala) ukukutika ku butantiko ubo bumweba ukutula *Ici* tacili i Cebo cakwa Lesa kabili ne Cine. Mwikesha ukutala uumfwa ku fyakwelenganya ifili fyonse ifyo ifishabikwapo nokulandilwa kabela na Shikulu Yesu Kristu. Pantu, Ena, ilyo Aishile Umwine nokundapa abalwele, Ena acitilefye ico pakutula i Cebo cingafikilishiwa. Ukufikilishafye i Cebo!

¹⁸³ Ena alisobela fyonse fibili, ku misango yonse iya ma chalichi. Mu Kusokolola, iya 17, itila, “Namwene umwanakashi, cilende mukalamba, naikala pa ciswango icakashika ce, pa mitwe cine lubali.” Vaticanani yaikala pampili cine lubali. Eko nafumine, imyeshi inono iyafumako. Kabili atile, “Ali ni nyina wa ba cilende,” abana banakashi abafyelwe kuli ena. Umwanakashi onse umubi kuti afyala umwana mwanakashi umusuma. Lelo moneni. Cilende ni cinshi? Cilende. Nibani

aba banakashi be shina ilyabipa? Baume. . . Banakashi abacita ubucende nokwikala na baume bambi abashili umulume babo.

¹⁸⁴ Kabili aba bantu, ifi fichalichi, fiitunga ukuba ababomfi bakwa Lesa kabili chalichi cakwa Lesa, kabili ababula ukushipikisha kabili bacita ifintu fya mwisonde. Bacita ubulale lale bwaku mupashi. Bena baleka ulukuta lwabo ukupenta, bena. . . abanakashi balafwala utuputula. Kabili balabaleka ukuya nokufwala nge sonde, kabili balafilwa ukususha ico. Bena baleka abaume balepepa fwaka yakwishishapo, nangu ukunwa ubwalwa. Babaleka ukukwata amangalo yamakadi ayanono, nokuteya kamupila kakusunka necimuti petebulo mumuputule uwaba pesamba lya cikulwa, nokukwata ifyakushana mwibumba namasha mu chalichi, nefyakulya fya mulalilo nefintu fyonse ifyashala, kabili nokufundisha utuntu utunono utwa mipepele mucifulo ca Cebo cakwa Lesa wa mweo. Namwisha ukutila ici cishinka. Cinono, icabaice, icabanakashi, ico Nshishibe, icakwa ciwa! Kabili mwi Shina lyakwa Kristu, Nacikalipila, mu lubuuto lwa Cebo cakwa Lesa, nokutila, “Ifwe tulingile ukuba ababikwamo amaka ayapya, abaputwamo na Mupashi wa Mushilo, abafyalwa cipya cipya, abaenda mukuicefya, kabili mu Kubapo kwakwa Lesa, nga atusangwako muku Sumbulwa munshiku ishileisa.” Fumeni kufintu. . . ifyakwa Lesa, imwe mwebantu, pamakufi yenu. Mwe chalichi cakwa Lesa, mwebalanda ukutila mwalitomona pampela—pamapalo ya mapalo yakwa Lesa, ikaleni ne Cebo cakwa Lesa. Kabili icintu conse icapusana kuli Cena, talukeniko kuli cena, nokutwalilila ukuya pantanshi. Inyali sha mucungulo bushiku shili pano. Shikulu Yesu aleisa nombaline.

Lekeni tukontamike imitwe yesu pakashita fye.

¹⁸⁵ Oh, kuli bulya Bushiku bukalamba, bulya Bushiku bwa bushiku, kabili lilye Buuku lya mabuuku. “Kabili ama Buuku yaiswilwe, kabili no muntu onse apingwilwe umwabela Ifyebo ifyalembelwe mwi Buuku.”

¹⁸⁶ We mubusu, we cibusa wandi uwabepekwa, tebonse. . . Ee, cibusa wandi, kabili waeshiwa apa fye, kabili waliwisha umwela. Cimo cinefye nge cuni, Namwene, cileesha ukupuma umutwe waciko pe windo, ukuti cishimye ulubuuto. Ni cinshi ico acitile? Ena—ena apumine fye ubongo bongo bwakwe umwine. Ulubuuto lwatwalililepo.

¹⁸⁷ Ubushiku bumo, kulya mu Cabumbwa ica Buntungwa, mulya mukuboko ukukalamba, utuni utunono twalilambalele natufwa. Natile, “Nicinshi icacitike?”

¹⁸⁸ Umuntu atile, “Kwali—kwali icimwela camaka ubushiku bwafumineko. Kabili mucimwela camaka, ifi ifyuni ifinono fyapupukile mulubuuto. Mucifulo cakubomfya ulubuuto ukuya mukucingililwa, twaeseshe ukuma nokushimya ulubuuto,

notumapindo twatuko utunono. Kabili balipumine tubongo bongo twatuko.”

¹⁸⁹ Mwiesha ukuma babongo bongo benu, ukulenga i Cebo cakwa Lesa ukulanda icintu cimo ico Cena taticita. Mwilaesha ukulingana notubungwe twamuli buno bushiku, pantu, “Nga mwatemwa isonde, nangu ifintu fya mwisonde, ukutemwa kwakwa Lesa takwaba muli imwe.”

¹⁹⁰ Cinshi tekuti usendele fye u Lubuuto lwa Mbila nsuma nokupupukila ku kucingililwa muno bushiku? “Oh, tucingilileni, Lesa.”

¹⁹¹ Shifwe uwa mu Myulu, nga baume na banakashashi abo bekele muno, abalumendo nabakashana, abantu abaleya ku Muyayaya, a—amafuta nolubuuto yamuli lino isonde, nefintu ikumi limo namutanda ifyo twapangwa nafyo. Mumubili wabo mwaba umweo uwaba nobusuma; ukutendeka, ukutampa.

¹⁹² Kabili Napepa kuli Imwe, Shikulu, ukubomba nombaline pamo naula umutima, ulya umweo, kalya akalitoni akanakilila ako akekala inshiku pe, ico ciletupela ukwenda kwesu. Kabili Napepa ukutila Mwalapususha umubembu onse uwaluba, muno bushiku. Leken beluke, ukutila ifi ifipilala ifikalamba ifyakulanga ba mailoshi ifyo tulepitapo, ifi fishibilo mumbali shonse ishamusebo, cena kusontafye ukwa kwisa nombaline ukwa Umo umulungami, Shikulu Yesu; Uyo, ukuba cibusa wayo, cipilibula u Mweo; ukumwishiba, Mweo wa Muyayaya. Kabili ifwe kuti twa Mwishiba fye umwabela Baibele, teku chalichi cesu; lelo, Mukufyalwa, Ukufyalwa ukupya, ukufyalwa cipya cipya.

¹⁹³ Kabili, mwe Taata, Nincetekela, no mutima wandi onse, tamuli umuntu ufwa muno, pamo naine wine, abo abengafwaya ukusekwa nangu ukuya kumbo. Kabili mulandu nshi twingalekela icintu cimo ukwiminina munshila yesu? Mulandu nshi twingapokelela icabufi, lintu imyulu yaisulamo icituntulu?

¹⁹⁴ Kabili ilyo isonde lili mumalila ya mwangashi ayakalamba aya mu Babyroni, ukunwa umwangashi, ukukolwa nokupanga icongo, abanakashi abafwala citika, abakumbali nga filya Nebuchadnezzar akwete, pali icilembo icileselela pa cibumba. Bakamona balecimona cileisa, abema ukucila umuntu uwalanga. Tulacimona pantu calilembwa mu Cebo. “Takwakabe amenshi nayambi, lelo umulilo ino nshita.” Kabili tulemona icilembo pa cibumba. Tulemona ukutila icalo conse nacisekwa.

¹⁹⁵ Kabili Lesa ali nokusenda i Chalichi Cakwe, icafyalwa cipya cipya. Inshita ileisa ilyo balya kunuma munkulo yaba Lutherani, inkulo ya Methodisti, ukupita monse munkulo, abo abalala utulo ne mitima ya cine, muli Lesa, ilyo inyanje shali fye ibula ilinono, kabili ilyo wali umupupunga, lelo, pamo, ulya mweo ukakolonganikwa capamo, nokubuuka kukesa. Abo bonse abo

bakapanga u Mubili uusuma uwakwa Shikulu Yesu, nombaline uuli mupepi.

¹⁹⁶ Mwatile, “Abo abaka Cina bakaposwa kunse mumfifi, bakalila nokulosha, nokusumanya ameni.” Mwe Taata Lesa, takwaba umuntu uwingafwaya ukuba kulya.

¹⁹⁷ Oh, kwateni uluse pali ifwe, mwe Lesa. Kabili ne mitima yesu iyalapila, ne mitwe yesu iyalosha ku lukungu, uko Mwatufumisha, kabili nga cakutila Mwakokola ukwisa, tuli nokubwela. Lesa, aba uwaluse kuli ifwe, lintu Ndepapatilako ili bumba ililelelela. Panuma ya iyi Mbila muno bushiku, Napepa ukutila Muli nokubusha abantu kukwiluka kwa bwiminishi bwabo mu Kubapo Kweni.

¹⁹⁸ Kabili ilyo tucili natukontamika imitwe yesu, bushe kuliko umuntu muno... Nibanga, ntile, (kuli nokuba abengi muli imwe,) abo abaleiluka ukutila umweo wenu tawampana pamo ne Cebo cakwa Lesa? Walileshanya leshanya munshila. Mwachetekela citka. Kabili walisenda isonde ilinono, ne cinono ca *ici* ne cinono ca *ico*. Kabili walilwala nokutendwa palwa ico, muno bushiku. Oh, wailundile ku chalichi, ico cishinka; nalimo tamwacitile ico. Nshishibe. Lelo, ku cinso cakwa Lesa, Untu twingeminina mu Kubapo Kwakwe ilyo ulucelo talulafika, kuti limbi kwaba ibomba lya atomiki ukonaula ici cintu conse, ucifumyapo, lintu akasuba takalatula mulucelo. Ibukisheni, ninshita yakasuba mu Russia nombi.

¹⁹⁹ Atile, “Babili bakaba mubusanshi,” kulingile ukuba inshita yabushiku kuncende imo ilyo Akesa, “umo akasendwa, umbi akashala.”

²⁰⁰ Bushe muli abaikushiwa, mu mutima wenu, mu lubuuto ulwa Cebo cakwa Lesa, mwalifyalwa cipya cipya ku Mupashi wakwa Lesa, kabili ifisabo fya Mupashi filakonka umweo wenu, nokutemwa, ukusangalala, umutende, ukukokola ukukalipa, ubusuma, icicetekelo, ubufuke, ukutekanya? Kulemukonka imwe?

²⁰¹ Nga teifyo, bushe kuti waba—waba uwamano nganshi, lekeni Ncibike muli iyo nshila, icakuti kuti waimya ukuboko kobe kuli Lesa, kabili wasumina ukutila naulufyanya, utile, “Mwe Lesa kwateni uluse pali ine, kabili ngafwilisheni ukuba umutundu wa mwina Kristu uo Mwingakabila ine ukuba, ukupitila mukumpela Mupashi wa Mushilo nokundeka naiikala ubwikashi bwa bulesu?” Bushe kuti waimyako ukuboko kobe kuli Lesa? Lesa paleni cila umo. Abengi, amaboko ayengi nayema pamuulu.

²⁰² Nombi, bushe kuliko bambi abengafwaya ukwimya ukuboko kwenu, abo abashacicita ifyo pali ilya nshita? Bushe kuti mwaimyako ukuboko kwenu? Banamayo... Lesa amupale. Mwe baume, mwe banamayo, bushe mula... Lesa akupale,

namayo. Lesa akupale, namayo. Lesa amupale, mukwai. Lesa akupale, nkashi. Lesa akupale, we mulumendo umunono.

²⁰³ Bushe namwiluka ico, efyo cili icakuposako amano ici? Tamwisa ku chalichi mukumfwafye i Mbila...nangu mukumona inkombe, Efyo ndepilibula. Mwisa mukumfwa i Mbila. Kabili i Mbila, yaba, Mupashi wa Mushilo ukusenda i Cebo cakwa Lesa noku Cipela kuli imwe.

²⁰⁴ Nomba, nga palwa ico? Limbi mulucelo ninshi inshita naipwa. Bushe uli uwakabila, mu Kubapo kwakwa Lesa, ukwimyako ukuboko kobe, weushimishe nanomba, tila, “Lesa, mbeleleni uluse. Ndefwaya u Mupashi Wenu muli ine”? Pantu... Lesa amupale, mukwai. Lesa amupale. Lesa amupale kunuma uko. Lesa akupale, naiwe, naiwe, naiwe. Ee. Lesa amupale, mukwai. Lesa akupale, mukwai.

²⁰⁵ Bushe kuti mwaba abaipesha ukutula, “Mwe Lesa, Ndeya ku ng’anda yakwa Kabumba. Ndi mulwele kabili uwanaka. Lyonse nalefwaya umweo uwasangululwa. Kabili, muno bushiku, Ndeya ku ng’anda yakwa Kabumba, mukubika umutima wandi panshi, nokutula, ‘Mwe Lesa utobauleni, nokumpela umutima uupya, umupashi uupya, kabili bikeni u Mupashi Wenu palya pene pakati ka uko.’ Kabili lekeni umweo wandi utwalilepofye ukulingana ne Cebo Cenu. Mpangeni ukuba Mikaya uwa mubushiku buno, icakuti Ningeminina pali EFYA SOSA SHIKULU. Kabili icimonwa candi no mweo wandi, cakutula—cakutula Ninge kala ku cinso Cenu; te Ine, lelo u Mupashi muli ine, wikala umweo uo Baibele ifwaya. Ifyo efyo Ndefwaya ukuba. O mwe Lesa, ku luse Lwenu, nengeni ukuba ifyo fine”?

²⁰⁶ Umuntu umo nomba, we ushacimya ukuboko kobe, bushe nomba kuti wacita ico? Lesa akupale, namayo. Lesa akupale. Lesa akupale, namayo. Lesa akupale. Ikaleni fye tondolo nganshi, ilyo mulepepa nomba. Umutwe onse uwakontama, ilinso lyonse ilyaisalika, umuntu onse alepepa. Mukwimba neshiwi lyapanshifye, mubusuma, cipokeleleni nomba.

...ukucinjishiwa mukwangufyanya,
Tapali icikeminina pe sonde,
Shintilila pa fintu fya Muyayaya,
Ikato kuboko kwa kwa Lesa ukushicinja!
Ikato kuboko kwa kwa Lesa ukushicinja!
Ikato kuboko kwa kwa Lesa ukushicinja!
Kula isubilo lyobe pa fintu fya Muyayaya,
Ikato kuboko kwa kwa Lesa ukushicinja!

Isalailwa mukati na Lesa nomba.

Lintu ubulendo bwesu bwapwa, (Oh!)
Nga waliba uwacishinka kuli Lesa,
Isuma kabili iyabeka ing’anda yobe mu
Bukata,

Umweo obe uwasumbulwa ukamona! (Nomba
cinshi ico ufwile ukucita?)

Ikata kukuboko kwakwa Lesa ukushicinja!
(Ico e Cebo Cakwe.)

Ikato kuboko kwa kwa Lesa ukushicinja!
Kula isubilo lyobe pa fintu fya Muyayaya,
Ikato kuboko kwa kwa Lesa ukushicinja!

207 Ena ali apo pene mupepi naiwe.

208 Ndelolesha kunuma mwibumba nomba, ku mwaume
umunono uwatemwikwa; ashalikepo umutemwikwa wakwe,
ubushiku bumbi, pa kashita fye akanono. Naumbi uwikele pano,
pa ncende imo, ashalikepo umutemwikwa wakwe, pakashita
fye akanono. Ilyo baile, bena baikatilile ku kuboko kwa kwa
Lesa ukushicinja. Abalume babo abatemwikwa bali muno,
muno nshita yabushiku, ukwikatilila ku kuboko kwa kwa
Lesa ukushicinja, pakwishiba ukutula abatemwikwa bali no
kukumana nakabili. Oh, kuti caba shani nga tabakwete ico? Oh,
shintilila pa fintu fya Muyayaya!

Ikato kuboko kwa kwa Lesa ukushicinja!

209 Mwe Shifwe uwa mu Myulu, ilyo ulwimbo ulusuma
lulelila, kabili iyi ni mbila. Kashimikila, Mupashi wa Mushilo,
aleshimikila kuli ifwe nomba ukupitila mu nyimbo, ukutweba
ifyakucita ne iyi Mbila, muno bushiku, “Ikatilileni fye ku Cebo
cakwa Lesa icishicinja. Imyulu ne sonde fikapita, nokucinja, lelo
i Cebo Candi takakapite.” Cena tekuti cicinje. Cena Cebo cakwa
Lesa icishicinja.

210 “I Cebo Cenu Nalifisa mu mutima wandi,” efya landile uwa
malumbo ukuti, “Ine nshaka Mubembukile.”

211 Kwacibako amaboko amakumi yabili nangu yatatu
ayacimishiwa, muno bushiku, Taata. Abaume na banakashi
balomfwa i Cebo, lintu, “Icicetekelo cisa mukumfwa.” Balipanga
uku, ukusala umusangwa ifintu fyonse, ukutula ukupitila
mukwafwilisha Kwenu nokusenamina Kwenu, ukufuma pali ino
ora ukuya kuntanshi, bali noku Mubombela.

212 Nomba bushe Tamwacite mubusuma, Taata, ukwingila mu
mitima yabo? Biken i Mupashi Wenu mu mupashi wabo
uupya. Mwalibapele umupashi uupya, nga teifyo nga tabacikata
amaboko yabo. Nga tabacikabila ico. Lelo, baciya ku ng’anda
yakwa Kabumba, kabili baci Muleka ukupilibula ifyakumfwa
umfwa fyabo na matontonkanyo yabo. Kabili nomba, mu mitima
yabo, baba abanakilila.

213 Kabili Mwatile, “Takuli umuntu uwingesa kuli ine kano
Taata Wandi amuleta.” Bena nga tabemishe amaboko yabo,
ukufuma ku mwaice ukufika ku mukalamba, kano Mwabebe
ukucita ico. Nabacita ico pantu Namulanda nabena. Kabili

cena ni Lesa, ukubapela kuli Kristu, nge cabupe cakutemwa. Nabapela imitima yabo.

214 Kabili tuleumfwa ishiwi Lyenu ilikalamba liletila, “Uyo umfwa i Cebo Candi.” Te Chalichi Cenu; i Chalichi Cenu calikwata i Cebo Cenu, kabili Cena tacaba icapusana ku Cebo Cenu. “Lelo uyo umfwa i Cebo Candi, nokucetekela pali Ena uwa Ntumine, nakwata u Mweo wa muyayaya, kabili takese mu bupingushi, lelo nafuma mumfwa aingila mu Mweo.”

215 Bapaleni, mwe Taata, nomweo wanshiku ishingi, no Mweo wa Muyayaya. Kabili nokubemya pa Bushiku bwakulekelesha, nga fintu Mwalaile. Kabili lekeni uku kube ukulongana ukalamba ukwakuipela, ilyo aba mushilo bakwa Lesa uwa mweo balasangalala nokulengwa cipya cipya.

216 Lekeni abalwele, cila umo, nga kuliko abali bonse abalipo, lekeni bondapwe. Lekeni u Mupashi Wenu usokololwe, ukupitila muli Kristu Shikulu wesu.

217 Nomba ne mitwe yesu iyaima, pakashita fye. Ndeingilamo, imwe mwe bacimya ukuboko kwenu, Ndecetekela mwacisumina ifyo mwacilanda. Lelo, kabili Ndecetekela ukutula mwaciba ababufumacumi. Kabili Ndemutwala ku Cebo cakwa Lesa, ico caba Icine.

218 Nomba kulifye ilipusho limo, uko, bushe mwacipilibula ico? Nga mwacipilibula ico, ni Lesa acikonkonsha pa mutima wenu. [Munyina Branham akonkonsha pa cintamba imiku itatu—Kale.] Ico nacilungama. Nomba, nga imwe mucine cine mwacipilibula ico, lyena ifintu fyakale nafipita. Lesa eflyo alanda. Cena tekuti cicinje.

219 Yesu atile, “Uyo umfwa Ifyebo Fyandi nokucetekela pali Uyo uwa Ntumine, nakwata u Mweo wa muyayaya.”

220 Ndetontonkanya, nga cena mucine calicitike mu mutima wenu, ukutula imwe kuti mwaumfwa abatotela apakalamba kuli Lesa, ukutula kuti mwafwaya ukuya ku cipailo Cakwe pano, nokufukama noku Mutotela pafyo Amucitila.

221 Kabili ilyo nkashi aletwalilila no lwimbo lumu lwine. Kuti nafwaya bonse abacimya ukuboko kwakwe, pamo nabo abashacicita ico, abalekabila ukucita ico, bese. Kabili lekeni tufukame nokupela ishiwi lyakukutotela ku Wamaka yonse, pafyo Atucitila. Ico cileshininkisha ukutula mwaciba aba bufumacumi.

Shintilila pa fintu fya Muyayaya,
Ikato kuboko kwa kwa Lesa ukushicinja!

Lintu ubulendo bwesu bwapwa,
Nga waliba uwacishinka kuli Lesa,
Isuma kabili iyabeka ing'anda yobe mu
Bukata,
Iyo umweo obe uwasumbulwa ukamona!

Ikato kuboko kwa kwa Lesa ukushicinja!
 Ikato kuboko kwa kwa Lesa ukushicinja!
 Kula isubilo lyobe pa fintu fya Muyayaya,
 Ikato kuboko kwa kwa Lesa ukushicinja!

Oh! *Nde Pitamo.*

222 Nomba Ndetontonkanya, natukwata bakakumba abengi nabakabila wa mbila nsuma muno, muno bushiku, abo abatemwa ukumona imyeo yaba mu Bufumu bwakwa Lesa, Ndeingililamo, mweba bwananyina, nga cakutula, kuti mwaisa pano, ba kakumba, kabili Ndeingililamo nga cakutula ababwananyina kuti babula icifulo cabo pano pene twalapepelako aba bantu abatemwikwa.

223 Bushe namwishiba? Ukulingana ne Cebo, Nala Cesha. Bena bacimya amaboko yabo ukutula bengasumina i Cebo cakwa Lesa ica Muyayaya, muno bushiku, nokucetekela. Kabili Natila, “Nomba ifwe twacipepa.”

224 Nomba lolesheni paco Yesu alandile. Leken i tucitwale ku Cebo nomba. Twalikwata ifingi ifyakwelenganya, lelo lekeni tufisende ku Cebo. Yesu atile, “Uyo umfwa i Cebo Candi, nokucetekela pali Uyo uwa Ntumine, nakwata u Mweo wa muyayaya, kabili takese mubupingushi, lelo nafuma mumfwa aingila mu Mweo.” Lesa efyo alanda. Ico cilecipwishisha inshiku pe. “Takuli umuntu,” efyo Yesu alandile, “uwingesa kuli Ine, kano Taata amwita. Kabili bonse abo Taata Ampela, bakesa kuli Ine.” Takuli nangu umo uwaluba. “Uyo ulya umubili Wandu no kunwa u Mulopa Wandu nakwata u Mweo wa muyayaya, kabili Nkamwimya pa bushiku bwakulekelesha.”

225 Oh, ifyo caba icakusungusha, ukulolesha pali ici icipailo, lintu umweo umo, walingana nefyalo amakana ikumi. Tabacisa mukuyampanya kwi chalichi. Bacisa pantu niba membala ba Mubili wakwa Kristu. Bacisa kuno mukupela ukutotela nokupepa. Kabili Napepa ukutula u Mupashi wa Mushilo walasuba nokwisusha umutima onse, uku noku pali ici cipailo, muno bushiku, nomutende, kabili uusuma, umupashi uwapetama, uyo uli nokuleta ifisabo nobulungami bwakwa Kristu, ilyo lyonse muli umupu mu mibili yabo, nokuya ku Mwesu, ku Bukata.

226 Bushe bakabila wambila nsuma naba kakumba kuti baisa nokwiminina pamo naifwe, ilyo tulepela ipepo, nga kuti mwacita ico. Bonse, temulandu icilonganino mwabako nama chalichi, abashakwata ifyakucita naco. Tulefwayafye mwise musinguluke aba bantu.

Ndepitamo, ee, Ndeya...(Leken i co cibe amapange ya mutima wenu.)
 Ndi nokulipila umutengo, paco abena Kristu bambi bacita,

Nkasenda inshila (Nga Mikaya.) nabanono
 abasulwa abakwa Shikulu,
 Nalitampamo na Yesu, kabili Ndepitamo.

Oh, Ndepitamo, ee, Ndeya . . .
 Ndi nokulipila umutengo, paco abena Kristu
 bambi bacita,
 Nkasenda inshila nabasulwa abanono abakwa
 Shikulu,
 Nalitampamo na Yesu, kabili Ndepitamo.

227 Ndi . . . Bushe kuliko naumbi ulefwaya ukusenda inshila?
 “Iwe uli nensoni pali ine kucinso cakwa Taata Wandi, nangu ku
 cinso ca bantu, Ine ndi nokuba nensoni pali iwe mulucelo, ku
 cinso caba Malaika.”

228 Bushe uli nensoni kucinso ce bumba ilinono muno bushiku,
 ukubula ubwiminishi bobo? Bushe uli nensoni? “Uyo uli noku
 Numbula pacinso cabantu, ena Nkamulumbula ku cinso cakwa
 Taata Wandi.”

Ndi nokusenda inshila, Shikulu, Ndepitamo.
 Nalitampa na Yesu, kabili Ndepitamo.

229 Benifye mwipepo, umuntu onse, ilyo balepela ukutotela kuli
 Lesa, pa kwelelwa kwa membu shabo.

230 O mwe Lesa, Taata kabili Kalubula wa bantunse, aba nabesa
 ileelo muno shita yabushiku, baleyebelela ukutula tababikwa
 bwino mu Mubili wakwa Kristu. Kabili nabesa, muno bushiku,
 ukusenda icifulo cabo nobutungulushi bwa kuboko kwa kwa
 Lesa, ne Cebo.

231 Kabili twapepa, nomba, ukutula Mwalababika mucifulo
 mu Bufumu, onse untu bali nokubomba. Kabili lekeni bena,
 no mutima umo, muno bushiku, bacetekele pa Cebo Cenu ica
 mushilo. Kabili lekeni Imwe, ku Mupashi wa Mushilo, mulande
 kuli bena, kabili lekeni bena fye, ukupitila mukuputwamo,
 batungululwe pa cifulo mu Mubili wakwa Kristu, uko
 Mwabetila.

232 O mwe Lesa, ifyo tule Mutotela pali ici! Ici ca bukata
 mu cinso Cenu. Cena cilemya imitima yesu pakumona abaume
 na banakashi abalefukama mukuicefya pa cipailo, nokulapila
 kufilubo fyabo, nokupapatila uluse. Basendeni mubapishe,
 Shikulu.

233 Ababomfi benu abasubwa, bakapyunga aba Cebo,
 nabeminina pambalii lwa aba bantu, kabili Ninjiminina
 pano pali ili tebulo ilya mushilo.

234 Ino ninshita yawamisha. Ba Malaika bakwa Lesa nabatanika
 inkambi yabo, mukati ka ino ncende, muno bushiku. Pantu
 calilembwa mu Cebo ukutula, “Ba Malaika bakwa Lesa bapanga
 inkambi pali abo aba Mutina.”

²³⁵ Kabili mwisonde ilikalamba ilishimoneka, kabili lyalitushinguluka, ukwimya ifyakumfwa umfwa kukulapila, nkuleta ububifi kucinso cesu, ifyo twalufyanya. Nemitima iyalapila, ifwe tulafuma kunshila shesu ishabipa, Shikulu, kabili nokwipusha paluse ulwa kwa Lesa. Kabili lekeni Mupashi wa Mushilo, Uyo uwatulaya uluse, peleni cena kuli cila umo muli ifwe, ilyo mukuicefya tulelomba nokwipusha Lesa ukufikilisha i Cebo Cakwe, kabili ukukula imyeo yesu ne mibele yesu ukulingana ne Cebo Cakwe. Twaipusha mwi Shina lyakwa Kristu. 

57-0120E Lesa Alasunga I Cebo Cakwe
Branham Tabernacle
Jeffersonville, Indiana U.S.A.

BEMBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Icishibisho ukufuma ku mwine kalemba

Insambu shonse tashisuminishiwe. Ili buku kuti lya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalembwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org